

摘藻堂四庫全書薈要

集部

欽定四庫全書薈要

集部

王右丞文集卷二

詳校官助教臣常循



欽定四庫全書薈要卷一萬三千六百三十四

集部

王右丞文集卷一

唐王維撰

明顧起經注

賦表狀露布

白鸚鵡賦

文苑英華注以容日上飾孤飛色媚為韻同韻作者郝名遠輩

若夫名依西域族本南海同朱喙之清音變綠衣於

一作

而素彩惟茲鳥

一作禽

之可貴諒其美之斯在夫其入翫

於人見珍奇質狎蘭房之妖女去桂林之雲日易喬枝

以一作於

羅袖代危巢以一作於

瓊室慕侶方遠依人永畢

託言語而雖通顧形影而非匹經過珠網出入金鋪單

鳴無應隻影長孤偶白鵬於池側對皓鶴於庭隅愁混

色而難辨願一作每

知名而自呼明心有識懷思無極芳

樹絕想雕梁撫翼時嚙花而不言每投人以方息慧性

孤稟雅容非飾舍火德之明輝被金方之正色至如海

燕呈瑞有玉筐一作筍

之可依山雞學舞向寶一作瑤

鏡而

瑤

鏡而

知歸皆羽毛

一作毛羽

之偉麗奉日月之光輝豈憐茲鳥地

遠形微色凌紈質彩奪繪衣深籠久閉

一作開

喬木長違

儻見借其羽翼與遷鶯而共飛

英華注凡一作皆文粹及本集並無韻脚三賦

雖注八韻今第一第二篇並止五韻疑唐制不同當考

賀古樂器表

臣維言伏見今月七日中書門下敕牒道士申太芝奏稱伏奉恩旨令臣往名山修功德去載六月二十日於南海葛洪居處至誠祈請中夜恍惚見一老人云是茅

山羅浮神人常於七曜洞來往昔曾九疑山於桂陽石室中藏天樂一部歲月久遠變為五野猪彼郡百姓捉獲汝可往取獻皇帝每祈祭但依方安置奏之即五音自和天仙百神應聲降福所求必遂壽命延長臣奉神言即往桂陽尋問百姓云天寶二載村人常見有五野猪逐之便走入石室就裏尋覓化為石物五枚衆共驚異臣取以扣之音律相和與神人言不異今將奉進者臣聞陰陽不測之謂神變化無方之謂聖唯神與聖感

而遂通伏惟開元天寶聖文神武應道皇帝陛下居皇
建之極中得混成之大道奉先天之聖祖玄化協於無
為育率土之羣生至仁侔於陰騭然猶精意不倦聖祀
逾崇遍禮羣仙思祐九服故得龐眉皓髮遙同入昴之
人真訣玄言來告馭風之客棲身七曜以俟唐堯藏樂
九疑不傳虞舜留茲石室思獻玉墀憑野豕以呈形表
洞仙之屬意且神物思變古亦有之龍躍平津實為寶
劍鳧飛葉縣空餘素履器非上品人纔下仙猶能精誠

聿修神變浚若況殊庭致貺天老効祥願授至尊以享
上帝亦既考擊動諧律呂韶濩慙其九奏雲咸失其八
音翠鳳入於洞簫殊非雅韻朱鷺傳於鼗鼓敢比仙聲
天地同和神祇降福無窮之壽永撫寶圖無彊之休以
康庶績實由至德斯感大道玄通神人親告於休徵靈
仙不秘其空樂稽之古昔實未見聞臣等限以留司不
獲隨例抃舞不任踴躍喜慶之至

賀玄元皇帝見真容表

臣維言伏見中書門下奏上黨郡奏啓聖祖大道玄元
皇帝玉石真容主上聖容今月十五日三元齊開光明
其日戌後道士陳希玉等十三人同朝禮見殿內有光
非常照耀及開殿門其光彌盛滿堂如晝久之方散其
時檢校官及押官等皆共瞻覩者臣聞仙祖行化真氣
臨闕聖人降生祥光滿室固知仙聖必有景光伏惟開
元天地大寶聖文神武應道皇帝陛下大道為心上元
同體挾風雲之質敬想猶龍寫日月之儀欽承大象仍

廻舊邸以奉清都真容聖容既明四日照殿照室忽類
三光藻宮自明初謂上天無夜桂殿如晝還疑就日而
朝琪樹韜華瑤池奪暎實由陛下弘敷本際大啓玄宗
明君潤色於真源聖祖和光於帝載表文明之在御六
合以清知臨照之無彊億載多慶臣等限以留司不獲
隨例拊舞無任踴躍喜慶之至

賀神兵助取石堡城表

臣維等言伏奉中書門下牒伏見絳郡太平縣百姓王

英杞狀稱去載七月於萬春鄉界頻見聖祖空中有言
曰我以神兵助取石堡城當時具經郡縣陳說並有文
狀申奏訖今載正月又於舊處再見云我昔於梓州威
洞造一龕尊像在獨坐山東北公成山左側年代已遠
其處傾陷像在土中可報吾孫令人往取斯廼蒼生之
福國祚無疆者近奉進止差直省往彼求覓昨見梓潼
郡奏稱去年某月二十六日郡縣官吏并道士父老百姓
等一千餘人與直省李萬德依此尋求其日諸山盡

皆晴朗惟公成山上雲霧暗合遍尋不知所在遂結壇
齋戒祈請經宿至二十七日辰時有五色雲見於霧合
之處遂即分人子細尋覓乃見山半腹有少土傾處其
上竹樹非常蒙密并見一石角出土一寸便穿掘深三
尺已來乃是一石龕龕中有尊像一左右真人六并師
子崑崙各二遂以水洗沃儀相儼然事實吐符並如真
誥其石龕重大非人力所能運轉今於龕上造屋宇便
差精誠道士三人專修香火供養謹畫圖奉進者臣聞

玄德升聞與至降監必錫靈貺彰厥有成不秘祥符昭
其克享伏惟開元天地大寶聖文神武應道皇帝陛下
以道理國以奇用兵先天而法自然終日不離輜重故
得仙君居九霄之上屢降中州聖祖在千古之前還臨
後葉視之不見者今見聽之不聞者今聞仍敕神兵以
助王旅天丁力士潛結鸛鵲星劍雲旗暗充貔虎遂殲
逆命之虜果屠難拔之城加以言必有徵德無不報指
尊像之所在為寶祚之休徵周流六虛言於晉而驗於

蜀混成一氣出於有而入於無未達齋心初迷三里之

霧既符真氣俄

舊作我非

成五色之雲山腹洞開仙容儼若

萬物今覩千劫未逢昔河啓籙圖山輸玄女尚謂得天
之助藏為受命之符況真誥人聞聖容神造照臨下土
不住大羅之天保佑羣生爰啓小有之洞實感明主縮
地而來豈比漢時乘空而去元后欽崇之福遠至邇安
聖祖昭報之心天長地久臣等限以留司不獲隨例拊
舞不勝踴躍喜慶之至

門下起赦書表

伏奉制書如右好生之德洽於人心奉天之時以行春
令體元作則惟聖裁成伏惟乾元大聖皇帝陛下道凝
庶績功深廣運極孝敬於至誠致雍和於允穆狹其祝
網陋彼畫衣寧失不經況乎輕繫大赦戮餘之罪益寬
流宥之典人謂無冤何如捨而不問殺而有禮豈若至
於無刑加以親減庶羞無祭肺之膳下除冗食贍糊口
之人買犢設闕藏彼無歸之骨歲取畝收本乎盡徹之

稅巨猾止於一惡貧人免於十夫思折券者寬其暴征
嘗書勲者貫其宿負道德齊禮成其有恥之心悔咎思
愆開其自新之路道之一變將使比屋可封守在四夷
庶夫外戶不閉風俗忠厚禮讓興行六府孔修萬代永
賴臣等忝居門下不任鳬藻抃躍之至

謝除太子中允表

臣維稽首言伏奉某月日制除臣太子中允詔出宸衷
恩過望表捧戴惶懼不知所裁臣聞食君之祿死君之

難當逆胡干紀上皇出宮臣進不得從行退不能自殺
情雖可察罪不容誅伏惟元天文武至聖皇帝陛下孝
德動天聖功冠古復宗社於墜地救塗炭於橫流少康
不及君親光武出於支庶今上皇返正陛下御乾歷數
前王曾無比德萬靈抃躍六合歡康仍開祝網之恩免
臣釁鼓之戮投書削罪端袵立朝穢汙殘骸死滅餘氣
伏謁明主豈不自媿於心仰厠羣臣亦復何施其面跼
天內省無地自容且政化之源刑賞為急陷身凶虜尚

沐官榮陳力興王將何寵異況臣夙有誠願伏願陛下
中興逆賊殄滅臣即出家修道極其精勤庶裨萬一頃
者身方待罪國未書刑若慕龍象之儔是避魑魅之地
所以鉗口不敢萌心今聖澤含弘天波昭洗朝容罪人
食祿必招屈法之嫌臣得奉佛報恩自寬不死之痛謹
詣銀臺門冒死陳請以聞無任惶恐戰越之至

謝集賢學士表

朝議大夫試太子中允臣維稽首言伏奉今月十八日

敕令臣充集賢殿學士擢及無能恩加非望抃躍慙懼
不知所裁且謂之集賢非賢莫集固當宣其五德列在
四科逖聽衆推方紆聖鑒臣抽毫作賦非古詩之流挾
策讀書無專經之業伏惟陛下文思超前哲之后書契
踰畫卦之君龜圖不能比其詞龍甲不足究其義聞相
如在蜀畏不同時徵枚乘於齊惜其已老急賢之旨欲
賜追鋒如臣不才豈宜濫吹將何以編次漆簡刊定石
經東堂賦詩將招不成之罰北面待詔必無善對之才

以榮為憂席寵知懼無任感恩踴躍戰越之至謹詣延
英門陳謝以聞

謝御書集賢院額表

臣維言伏奉今月某日聖札題集賢殿御書院額捧戴
抃舞不知所裁竊以先聖微言前王令典所以典行禮
義訓正人倫顧逆類兇頑不識經籍恣行毀裂有甚焚
燒伏惟陛下御極統天功成理定愍其墜簡旁搜古壁
發求書之使置寫書之官於是九流百家韋編緗帙爛

然虎觀盛彼鴻都加以親重儒門將為教首俯題金榜
自運銀鈎龍鳳翔於煙雲日月照於天地曾無以諭誰
敢強名況乎方丈之書七分入木仲將虛為白首義之
枉在墨池將使率土之人知陛下寵茲書府普天之下
敷陛下敦彼儒風政化之源實始於此臣忝編次漆簡
刊校石經載光載輝誠歡誠喜

為薛使君謝婺州刺史表

臣某言伏奉今日日制除臣某官拜命若驚稽首無地

臣聞洪波退流必盪其溷穢慶雲所潤不遺於荆棘伏
惟陛下孝悌之至通於神明馨香之德格於天地故指
旗而黑襖旋靜揮戈而白日再中豈臣蟲臂鼠肝所能
談天述聖臣之本末強欲自陳擢髮數罪臣戮餘也剖
心自明天知之矣臣素書生少為文吏折衝禦侮幾何
不亡奉法守文一日之長當賊逼溫洛兵接河潼拜臣
陝州催臣上道驅馬才至長圍已合未暇施力旋復陷
城戟枝義頭刀環築口身關木索縛就虎狼臣實驚狂

自恨駑怯脫身雖則無計自刃有何不可而折節兇頑
偷生廁溷縱齒盤水之劍未消臣惡空題墓門之石豈
解臣悲今於抱釁之中寄以分憂之重且天兵討賊曾
無汗馬之勞天命興王得返屠羊之肆免其釁鼓之戮
仍開祝網之恩臣縱粉骨糜軀不報萬分之一況褰帷
露冕是去歲之縲囚洗垢滌瑕為聖朝之岳牧臣欲殺
身滅媿刎首謝恩生無益於一毫死何異於腐鼠謹當
閉閣以思政酌泉以勵心親畢力於平人無煩八部誓

不負於明主非畏四知用釋愆誅敢求課最

為崔常侍謝賜物表

臣某言總管闕敬之至奉九月十五日敕吐蕃贊普公
主信物金胡瓶等十一事伏蒙恩旨特以賜臣捧戴慚
惶以抃以躍臣幸居無事待罪西門恭守嘉謨欽承成
憲王師不戰無汗馬之勞堯屋可封何理人之有實無
異効特降殊恩竊用勤以忘家志不顧命分膏草野以
報萬一無任感戴戰越之至

為畫人謝賜表

臣某言臣猥以賤伎得備衆工誤點屏風之成蠅之巧
偶持團扇無事特之能徒以職官不敢貳事顧惟時論
有慚三絕伏惟皇帝陛下撥亂反正受命中興俯協龜
圖傍觀鳥迹卦因於畫畫始生書知微知彰惟聖體聖
臣奉詔旨令寫功臣運偶鳳翔之初無非鷹揚之士燕
頤援臂裂眚奮髯髮衝鵠冠力舉龍鼎骨風猛毅眸子
分明皆就筆端別生身外傳神寫照雖非巧心審象求

形或皆暗識妍蚩無枉敢顧黃金取舍惟精時憑白粉
且如日碑下泣知其孝思于禁懷慚媿此忠節乃無聲
之箴頌亦何賤於丹青宣父之似皐繇元子之類越石
不待或人之說無煩故妓之言此又一奇誠為可尚臣
得舐筆麟閣繼踵虎頭頻蒙獎教之恩益用精誠自勵
勤以補拙雖未仙飛感而遂通實因聖訓况賜衣服累
問官資中使相望屢加宣慰微臣戰灼無答恩私之至
為曹將軍謝寫真表

臣某言天幸微臣身逢大聖得為列卒以備戎行於臣
一生已為萬足况建旗為將裂組受官蒙推食之恩辱
賜衣之寵匹夫之勇雖不顧身長策無聞未能盡敵仰
慚介冑俯媿橐鞬加以弓不重於六鈞箭不穿於七札
詎中雀目誠慙援臂以劉琨而恨小非關侯之絕倫何
以廁跡虎臣儀形麟閣伏惟皇帝陛下昭格天地懸超
七十二家微臣託附風雲不如二十八將而蒙垂聖旨
特命圖工畫植戟之黃鬚圖石稜之紫色才如過隙顧

侯已得其神不待臨淄鄒子自知其醜豈可藏之秘府
以示後人將謂飛龍之時無侯貔貅之士寵過其效力
不稱恩願死藝於伏弋誓殺身於鳴轂無任感激欣戴
之至

為幹和尚進注仁王經表

沙門惠幹言法離言說了言說即解脫者終日可言法
無名相知名相即真如者何嘗壞相實際以無際可示
無生以不生相傳非夫自得性空密印心地見聞自在

宗說皆通者何以證玉毫之光辨金口之義伏惟乾元
光天皇帝陛下高登十地降撫九天弘濟羣生濡蓮花
之足示行世法屈金粟之身心淨超禪頂法懸解廣釋
門之六度包儒行之五常老僧空空復何語語以無見
之見不言之言淺智勝疑冰之蟲微戒愈溺塗之象以
自覺離念注先聖微言如人何足盡思食木偶然成字
豈堪上塵慧眼仰稱聖心有命自天藏拙無地伏以集
解仁王般若經十卷謹隨表奉進無任慙惶然本注經

先發大願釋第一義開不二門與四十九僧離一百八
句六時禪誦三載懇祈俾廓妖氛得瞻慧日三千世界
悉奉仁王五千善神常衛樂土令果盪定無量安寧緇
服蒼生不勝慶躍

為舜閣恭謝御題大通大照和尚塔額表

沙門僧某等言伏蒙聖札題二大師塔額及度僧抽僧
等並畢伏喜天心俯從人欲恩光至重抃舞難勝臣聞
聖者正也持正法者為聖人佛者覺也得覺滿者入佛

慧伏惟光天皇帝陛下登滿足地超究竟天入三解脫
門過九次第定見聞自在不住無為理事皆如終非有
漏復皇國而御宇尊白法以教人百穀順成六氣時若
不加兵而賊破不擾物以人和緇侶勝緣蒼生厚幸昨
蒙書額度僧等龍騰金榜鳳轉銀鈎河漢昭回煙雲飛
動韋誕恥其遺法梁鵠慙為古人降出天門升於寶塔
玉繩綴於重級珠斗挂於露盤以方宸翰實多慚德又
宿修梵行願在法流者覆以慙媿之衣落其煩惱之髮

冀成寶器仁王為琢玉之因廣運佛心聖主受恒沙之
祐沙門等叨承禪訓幸偶昌期御札賜書足報本師之
德梵筵邀福願酬大聖之恩不勝戴荷之至

為僧等請上佛殿梁表

僧某言天地之大未滿法身紺殿朱宮豈云光宅陛下
尊崇像教大捨外財白法利人黃金布地不役一人之
力不費一家之產崇崇寶坊雲構將畢所營某寺以某
月日上佛殿梁伏望天恩內賜一緞庶使大千世界悉

入蓋中六合人天共歸宇下然後以無礙慧大化羣物
將使四生皆度豈唯比屋可封則中天之臺才留幻士
畫雲之觀徒候神人以古況今前王何陋謹詣右銀臺
門奉表陳請以聞

責躬薦弟表

凡一作俱見
文苑英華注

臣維稽首言臣年老力衰心昏眼暗自料涯分其能一作

壽幾何久竊天官每慙

一作競

尸素頃又沒於逆賊不能

殺身負國偷生以至今日陛下矜其愚一作懦

弱託病被

囚不賜疵瑕累遷省閣

一作閭注集作閭非

昭失

一作洗

罪累免負

惡名在於微臣百生萬足

一作死注集作足非

昔在賊地泣血自

思一日得見聖朝即願出家修道及奉明主伏戀仁恩

貪冒官榮荏冉歲月不知止足尚忝簪裾始

一作昔

願屢

違私心自咎臣又聞用不才之士才臣不來賞無功之

人功臣不勸有國大體為政本源非敢議論他人竊以

兄弟自比臣弟蜀州刺史縉太原五年撫養百姓盡心

為國竭力守城臣即陷在賊中苟且延命臣忠不如弟

一也縉前後歷任

一作効歷

所在著聲臣忝職甚多曾無裨

益臣政不如弟二也臣頃負累繫

一作狀

在三司縉上表

祈哀請代臣罪臣之於縉一無憂憐

一作恤

臣義不如弟

三也縉之判策屢登甲科衆推才名素在臣上小言淺

學不足謂文臣才不如弟四也縉言不忤物行不上人

植性謙和執心平直

一作坦

臣無度量實自空疎臣德不

如弟五也臣之五短弟之五長加以有功又能為政顧

臣謬官華省而弟遠守方州外媿妨

一作其

賢內慙比義

痛心疾首以日為年臣又逼近懸車朝暮入地閔然孤
獨迴無子孫弟之與臣更相為命兩人又俱白首一別
恐隔黃泉儻得同居相視而沒泯滅之際魂魄有依伏
乞盡削臣官放歸田里賜弟散職令在朝廷一作行臣當
苦行齋心弟自竭誠盡節並願肝腦塗地隕越為期葵
藿之心庶知向日犬馬之意何足動天不勝私情懇迫
之至

請施莊為寺表

臣維稽首臣聞罔極之恩豈有能報終天不返何堪永
思然要欲強有所為自寬其痛釋教有崇樹功德弘濟
幽冥臣亡母故博陵縣君崔氏師事大照禪師三十餘
歲褐衣蔬食持戒安禪樂住山林志求寂靜臣遂於藍
田縣營山居一所草堂精舍竹林果園並是亡親宴坐
之餘經行之所臣往丁凶釁當即發心願為伽藍永刳
追福比雖未敢陳請終日常積懺誠又屬元聖中興羣
生受福臣至庸朽得備周行無以謝生將何答施願獻

如天之壽長為率土之君惟佛之力可憑施寺之心轉
切効微塵於天地固先國而後家敢以烏鼠私情冒觸
天聽伏乞施此莊為一小寺兼望抽諸寺名行僧七人
精勤禪誦齋戒住持上報聖恩下酬慈愛無任懇款之
至

奉敕詳帝皇龜鏡圖狀帝皇龜鏡圖兩卷令簡擇
訖進狀

右某官宣口敕語看可否者臣愚何足以知謹與某等

議竊以名為帝王圖者蓋龜可以卜也鏡可以照也以
前代帝王行事善惡以卜後代以前代帝王行事善惡
以照後代可以知盛衰興亡故其行事似堯舜者必盛
似湯武者必興似秦皇漢武者必衰似夏桀殷紂者必
滅如卜之必知如照之必見故謂之龜鏡圖伏恐稍乖
之圖謂之自古帝王圖即可矣謂之龜鏡圖伏恐稍乖
名實又多不出於正經或取諸子之說又取曹植飛龍
篇摯虞庖犧讚等是一時文章之語非正經本傳之事

至於堯之茅茨不翦土階三尺就之如日望之如雲舜
之逐竄四凶舉十六族臣歌九德君撫五絃等善事夏
桀之瑤臺瓊室殷紂之肉林酒池等惡事蓋畫如此之
類乃成龜鏡之圖至於伏羲生時伏羲之墓女媧腸化
搏土為人如此之流豈為龜鏡若記帝皇之事總載無
妨若為龜鏡之圖恐須簡擇又論元氣已後其圖似重
太初與太始無殊有形與有質不異易云乾元亨利貞
即未有物者乾之始也乾者元之體也元者乾之用也

上猶道家旨道生一一生二二生三三生萬物又近佛
經八識是清淨無所有第八識即含藏一切種子第六
識即分別成五陰十八界此圖從元氣已下名目稍多
臣識用愚淺不知忌諱敢率鄙見無任戰越伏惟聖心
裁擇謹狀

請廻前任司職田粟施貧人粥狀

右臣比見道路之上凍餒之人朝尚呻吟暮填溝壑陛
下聖慈憐愍煮公粥施之頃年已來多有全濟至仁之

德感動上天故得年穀頗登逆賊皆滅報施之應福祐
昭然臣前任中書舍人給事中兩任職田並合交納近
奉恩敕不許併請望將一司職田廻與施粥之所於國
家不減數粒在窮窘或得再生庶以上福聖躬永弘寶
祚仍望令劉晏分付所由訖具數奉聞如聖恩允許請
降墨敕

謝弟縉新授左散騎常侍狀

右臣之兄弟皆迫桑榆每至一別恐難再見匪躬之節

誠不顧家臨老之年實悲遠道陛下均平布政中外遞
遷尚錄前勞仍收舊齒使備顧問載珥貂蟬趨侍玉墀
從容瑣闥不材之木附萼聯芳斷行之雁飛鳴接翼自
天之命特出宸衷塗地之心難酬聖造不勝戴荷踴躍
之至

上元二年五月四日通議大夫守尚書右丞臣王

維狀進

答詔

附

敕幸求獻替久擇勲賢具寮咸推令弟有裕既膺贊相

之任俯觀規諫之能建禮朝昇鵷行並列承明晚下鴈
序同歸乃眷家肥無忘國命所謝知

右唐肅宗
皇帝答詔

兵部起請露布文

天地之心無不覆載鳥鼠之性自私巢穴國家非徒彊
理其地臣妾其人思欲一車書混聲教變毒螫之俗為
禮義之鄉伏惟皇帝陛下大道先天至德冠古武功則
我有七德文教則舞於兩階億兆廣克封之時郡縣加
禹服之外而犬戎小醜蝸角偷安動搖遠邊遮漢使之

路脇從小國絕蕃臣之禮四鎮節度使高仙芝等虔奉
聖策肅將天誅因識闕之且憎尋勃律之舊好暨諸胡國
悉會王師萬里風馳六軍電掃羶裘之長思嚮風以無
階毳幕之人惟塗地而可獲遂通重譯罔不來庭實賴
聖謀仰惟帝力無攻不克百蠻皆歸於計中無遠不賓
萬方若在於宇下臣等不勝喜慶之至

王右丞文集卷一

欽定四庫全書薈要卷一萬三千六百三十五

集部

王右丞文集卷二

唐王維撰

明顧起經注

書序記讚文

與工部李侍郎書

一昨出後伏承令從官將軍車騎至陋巷見命恨不得
隨使者詣舍上謁才非張載枉傳玄以車相迎德謝侯

生辱信陵虛左見待古人有此今也未聞所以竦踊惕
息通夕不寐維自結髮即枉眷顧侍郎素風維知之矣
宿昔貴公子常不交布衣盡禮髦士絕甘分少致醴以
飯汲汲於當世之士常如不及故夙著問望為孟嘗平
原之儔及乎晚歲時危益見臣節草莽之中乘輿播越
列郡或棄車走林畏賊顧望貢獻不至莫有關心侍郎
慨然枕戈泣血奮不顧命捍衛聖主楊奉之以兵奉迎
蕭何之運糧致饋曹洪之以良馬濟趙哀之以壺飧從

收合亡騎繕治兵甲喻以大義慰而勉之然後以劔率

卒執戈前驅浹旬之間六軍響振以成興復之業豈非

侍郎忠節蓋世義貫白日垂名竹帛為一代宗臣誠可

愛也或曰宗子與國同休不得不爾也夫仁弱自愛者

且奔竄伏匿偷延晷刻窮蹙既至即匹夫匹婦自經於

溝瀆安能決命爭首慷慨大節死生以之乎而能不邀

寵於上不干功於下不怠邦政不受私謁時與風流儒

雅之士置酒高會吟詠先王遺風翛然有東山之志善

矣維雖老賤沈跡無狀豈不知有忠義之士乎亦常延
頸企踵嚮風慕義無窮也然不敢自列於下執事者以
為賤貴有倫等威有序以閒人持不急之務朝夕倚門
窺戶抑亦侍郎之所惡也而猥不見遺思曹公命吳質
將何以塞知己之望報厚顧之恩內省空虛流汗而已
輒先持狀候涼時即躬詣門下奉謝王維頓首

山中與裴秀才迪書

近臘月下景氣和暢故山殊可過足下方溫經猥不敢

相煩輒便往山中憩感配寺與山僧飯訖而去北涉玄
灞清月映郭夜登華子岡輞水淪連與月上下寒山遠
火明滅林外深巷寒犬吠聲如豹村墟夜春復與疎鐘
相間此時獨坐僮僕靜默多思曩昔攜手賦詩步仄逕
臨清流也當待春中草木蔓發春山可望輕條出水白
鷗矯翼露濕青皋麥雉朝雊斯之不遠儻能從我遊乎
非子天機清妙者豈能以此不急之務相邀然是中有
深趣矣無忽因馭黃蘗人往不二山中人王維白

與魏居士書

足下太師之後世有明德宜其四代五公克復舊業而
伯仲諸昆頃或早世唯有壽光復遭播越幼生弱姪貌
舊作貌非然諸孤布衣徒步降在阜隸足下不忍其親杖策

入關降志屈體託於所知身不衣帛而於六親孝慈終
日一飯而以百口為累攻苦食淡流汗霖霖為之驅馳
僕見足下裂裳毀冕二十餘年山棲谷飲高居深視造
次不違於仁舉止必由於道高世之德欲蓋而彰又屬

聖主搜揚仄陋束帛加璧被於巖穴相國急賢以副旁
求朝聞夕拜片善一能垂章拖組況足下崇德茂緒清
節冠世風高於黔婁善卷行獨於石門荷蓀朝廷所以
超拜右史思其入踐赤墀執牘珥筆羽儀當朝為天子
文明且又祿及其室養昆弟免於負薪樵蘇晚爨柴門
閉於積雪藜牀穿而未起若有稱職上有致君之盛下
有厚俗之化亦何顧影踞步行歌采薇是懷寔迷邦愛
身賤物也豈謂足下利鍾釜之祿榮數尺之綬雖方丈

盈前而蔬食菜羹雖高門甲第而畢竟空寂人莫不相
愛而觀身如聚沫人莫不自厚而視財若浮雲於足下
實何有哉聖人知身不足有也故曰欲潔其身而亂大
倫知名無所着也故曰欲使如來名聲普聞故離身而
返屈其身知名空而返不避其名也古之高者曰許由
挂瓢於樹風吹瓢惡而去之聞堯讓臨水而洗其耳耳
非駐聲之地聲無染耳之跡惡外者垢內病物者自我
此尚不能至於曠士豈入道者之門歟降及嵇康亦云

頓纓狂顧逾思長林而憶豐草頓纓狂顧豈與免受維
繫有異乎長林豐草豈與官署門闌有異乎異見起而
正性隱色事礙而慧用微豈等同虛空無所不遍光明
遍照知見獨存之旨邪此又足下之所知也近有陶潛
不肯把板屈腰見督郵解印綬棄官去後貧乞食詩云
叩門拙言詞是屢乞而多慙也嘗一見督郵安食公田
數頃一慙之不忍而終身慙乎此亦人我攻中忘大守
小不闕其後之累也孔宣父云我則異於是無可無不可

可者適意不可者不適意也君子以布仁施義活國濟人為適意縱其道不行亦無意為不適意也苟身心相離理事俱如則何往而不適此近於不易願足下思不可之旨以種類俱生無行作以為大依無守嘿以為絕塵以不動為出世也僕年且六十足力不强上不能原本理體裨補國朝下不能殖貨聚穀博施窮窘偷祿苟活誠罪人也然才不出衆德在人下存亡去就如九牛一毛耳實非欲引尸祝以自助求分謗於高賢也略

陳起予惟審圖之

暮春太師左右丞相諸公於韋氏逍遙谷讌集序

凡一作俱

見唐文粹

山有姑射人蓋方外海有蓬瀛地非宇下逍遙谷天都
近者王官有之不廢大倫存乎小隱跡崆峒而身拖朱
紱朝承明而暮宿青靄故可尚也先天之君俾人在宥
歡心格於上帝喜氣降為陽春時則有太子太師徐國
公左丞相稷山公右丞相始興公少師宜陽公少保崔

公特進鄧公吏部尚書武都公禮部尚書杜公賓客王

公黼衣方領垂璫珥筆詔有不名命無下拜熙天工者

坐而論道典

一作掌

邦教

一作典

者官司其方相與察天地

之和人神之泰聽於朝則雅頌矣問於野則賡歌矣廼

曰猗哉至理之代也吾徒可以酒合讌樂考擊鐘鼓退

於彤庭選

一作撰

辰擇地右班劒驂六騶畫輪載轂羽幢

先路以詣夫逍遙

下有谷字

焉神皋藉其綠草驪山啟於朱

戶渭之美竹魯之嘉樹雲出其棟水源於室灞陵下連

乎萊地新豐半入於冢林館層巔檻側逕

舊作趣非

師古節

儉惟新丹堊巖谷先曙羲和不能信其時卉木後春勾

芒不能一其令花逕窈窕蘅皋漣漪

一作超忽

驂御延佇於

叢薄珮玉升降於蒼翠於是外僕告次獸人獻鮮樽以

大罍烹用五鼎木器擁腫即天姿以為飾沼毛蘋蘩在

山羞而可薦伶人在位曼姬始縠齊瑟慷慨於座右趙

舞徘徊於白雲袞旒松風珠翠煙露日在濛

舊作蒙非

汜羣

山夕風猶有濯纓清歌據梧高詠與松喬為伍是羲皇

上人且三代之後而其君帝舜九服之內而其俗華胥
上客則冠冕巢由主人則弟兄元愷合是四美同乎一
時廢而不書罪在司禮竊賢楚傳常詣茅堂之居仰謝
右軍忽序蘭亭之事蓋不獲命豈曰能賢

洛陽鄭少府與兩省遺補宴韋司戶南亭序

凡一作見

唐文

粹

惟帝克辟惟股肱克左右庶績允釐有司多暇舉無違
德孰獻其可雖列侍丹陛而罕伏青蒲攄懷致館灞陵

南望曲江左轉

舊作輔非

登一級而鄠杜如近盡三休而天

地始大凝氣向晦蒼蒼寒木式與汝歌多酌我酒墨客

既序親當獸炭膳夫交馳屢奏鮮食夫含德之厚與時

偕化拂衣為

一作而

放則野人於小隱之中束帶而朝則

君子於大夫之後何軌轍一境是非外物哉且騎有羈

紲

一作勒

徒有次舍可以永日可以繼夜客非詩人之徒

歟奚其嘿也

舊本蒲下落一攄字

送高判官從軍赴河西序

今上合大道以撫荒外振長策以馭宇內故左言返踵
穿胸沸脣膺騰白波驟輸碧帑之貢腹阻赤坂傳致紫
琥之琛辮髮名王養馬於下廐黽結去帝獻珠於小臣
而犬戎不識蝸角自大偷安九服之外謂天誅罕及自
絕所國之後而王祭不供天子按劍謀臣切齒思以赤
山為城青海為塹盡平其地悉虜其人而上將有哥舒
大夫者名蓋四方身長八尺眼如紫石稜鬚如蝟毛磔
指撝而百蠻不守叱咤而萬人俱廢髮髯奮髯哮吼如

虎裂眦大怒磨牙欲吞不待成師固將身先士卒常思
盡敵不以賊遺君父矢集月窟劒斬天驕蹴崑崙使西
倒縛呼韓令北面豈直趙人祭其東門匈奴不敢南牧
而已開府之日辟書始下以為踴躍用兵健將之事意
氣跨馬俠少之能蓋欲謀夫起予哲士俾我殲黠虜以
無類舉外國如拾遺待夷門而不食置廣武於上座始
得我高子焉高子讀書五車運籌百勝慷慨謀議折天
口之是非指畫山川知地形之要害嘗著七發曹王慕

義每奏一篇漢文稱善緣情之製獨步當時主人橫挑
而有餘墨客仰攻而不下公卿藉甚遍交歡於五侯孫
吳暗合將建功於萬里徵以露版召見甘泉衣短後之
衣帶櫛具之劒象弧彫服鞭弭橐鞬目無先零氣射西
旅蒼頭宿將持漢節以臨戎白面書生坐胡牀而破賊
然孤烽遠戍黃雲千里嚴城落日而閉鐵騎升山而出
胡笳咽於塞下畫角發於軍中亦可悲也遲子之獻凱
雲臺奏事宣室紫綬曳地金印如斗列居東地位為通

侯舊友拜塵羣公書幣祁大夫老矣武安侯問乎

送李補闕充河西支度營田判官序

漢張右掖以備左袵西遮空道北護居延然犬戎夜獵
於山外匈奴射鵰於塞下歲或有之我散騎常侍曰王
公勇能盡敵禮可用兵讀黃石書殺白馬將入備顧問
載以乘輿副車出命專征賜以內棧文馬將軍幕府請
命介於本朝天子瑣闥輟諫官以從士補闕李公家世
龍門詞場虎步五經在笥一言蔽詩廣屯田之蓄度長

府之羨以贍邊人以弱敵國然後馳檄識匿略地崑崙
使麾下騎刃樓蘭之腹發外國兵繫郅支之頸五單于
遁逃於漠北雜種羌不近於隴上子之行也不謂是乎
拜首漢庭驅傳而出窮塞砂磧以西極黃河混沌而東
注胡風動地朔鴈成行拔劍登車慷慨而別

送懷州杜叅軍赴京選集序

國自有初以節守西門者得自召吏選客故我常侍崔
公以貳車迎杜侯於杜陵而咨之矣舍之門下衣儒者

之服立於軍中說諸侯之劒猗元帥之理也行有賁育
鐵馬成羣而雄戟罕耀角弓載橐秉王者師不邀奇功
樓庭藉甚高冠長劒拜命雲臺在是行也羣公自出轅
門驂駢滿路置酒欲飲高歌自悽寂寥孤城惆愴朔管
飛雪蔽野長河始冰吾子勉之慷慨而別

送鄆州須昌馮少府赴任序

少年明經試出補吏學通大義政習前典本之於德輔
之以才大官大邑可也不惟是歟予昔仕魯蓋嘗之鄆

書社萬室帶以魚山濟水旗亭千隧雜以鄭商周客有
鄒人之風以厚俗有汶陽之田以富農齊紈在笥河魴
登俎一都會也子其不寶貨不耽樂不弄法不慢官無
侮老成人無虐孤與幼上官奏課輜軒以聞則繡衣方
領垂璫珥筆子所得也誰敢有之子病且憊歲晚彌獨
窮巷衡門落日秋草趙服過我且東其轅促飯中厨子
不可以蔬食送車出郭吾不可以徒行屨以及門拜於
宇下猶且抱杖延頸送之以目城廻樹轉悲其馬嘶云

送鄭五赴任新都序

邠人前京兆右扶風居上谷間與寢園接七月之什蕩
無遺風五陵之豪雜居其地故有點吏惡少犯命干

舊作

非于紀政寬則以姦病人操急則以事中吏鄭子為邑也

絃歌之化洋溢四封雷霆之威燁赫百里下車按捕盡
致法焉繡衣下帷風俗之治苟以文墨抵罪除名為人
削跡於野杜陵解印時賣故侯之瓜彭澤無官詎有公
田之黍牽衣肘見步雪履穿獲戾由中是貧非病屬聖

朝龍旂鑾輅登封告成之事畢蒼玉黃琮郊天祀地之
禮備天下無事海內乂安盡登仁壽之域猶下哀憐之
詔萬方有罪與之更新百寮失職使復其位降邑宰為
輿尉從綰墨而解褐龍星始見馬首欲西搢紳先生居
多結友諸曹列署且有同時時工部侍郎蕭公詞翰之
宗德義之府弱年筮仕一命聯官於奉常幾日左遷六
人同罪於外郡羸金盛業克傳丞相文儒萬石高風彌
重故人賓客賦詩寵別贈言誠行騎登棧道館於板屋

劒門中斷蜀國滿於二川銅梁下臨巴江入於萬井黃
鸝欲語夏木成陰悲哉此時相送千里

送從弟惟祥宰海陵序

天子若曰咨爾三事百辟寇賊姦宄震驚朕師其舉吏
二千石至墨綬予將大命於朝以撫方夏羣從曰惟祥
舊有令聞克奉成憲往踐廼職無恫於人獄貨非寶農
食滋碩浮於淮泗浩然天波海潮噴於乾坤江城入於
泱泱彼有美錦爾嘗操刀學古入官倚法為吏上官奏

課國將大選爾勞勉哉行乎唱予和汝

送晁

舊作朝非

監還日本國序

舜覲羣后有苗不賓禹會諸侯防風後至動干戚之舞
興斧鉞之誅乃貢九牧之金始頒五瑞之玉我開元天
地大寶聖文神武應道皇帝大道之行先天布化乾元
廣運涵育無垠苦垂為東道之標戴勝為西門之候豈
甘心於邛杖非徵貢於苞茅亦由呼韓來朝舍於蒲萄
舊作陶非之館卑彌遣使報以蛟龍之錦犧牲玉帛以將厚

意服食器用不寶遠物百神受職五老告期況乎戴髮
含齒得不稽顙屈膝海東國日本為大服聖人之訓有
君子之風正朔本乎夏時衣裳同乎漢制厯歲方達繼
舊好於行人滔天無涯貢方物於天子同儀加等位在
王侯之先掌次改觀不居蠻夷之邸我無爾詐爾無我
虞彼以好來廢闕弛禁止敷文教虛至實歸故人民雜
居往來如市晁司馬結髮遊聖負笈辭親問禮於老聃
學詩於子夏魯借車馬孔丘遂適於宗周鄭獻縞衣季

札始通於上國名成太學官至客卿必齊之姜不歸娶

於高國在楚猶晉亦何獨於由余遊宦三年願以君羹

遺母不居一國欲其晝錦還鄉莊舄既顯而思歸闕侯

報恩而終去於是馳

舊作地非

首北闕裏

舊作裏非

足東轅篋命

賜之衣懷敬問之詔金簡玉字傳道經於絕域之人方

鼎彝樽致分器於異姓之國琅邪臺上迴望龍門碣石

館前賈然鳥逝鯨魚噴浪則萬里倒迴鷁首乘雲則八

風卻走扶桑若薺薺島如萍沃白日而簸三山浮蒼天

而吞九域黃雀之風動地黑蜃之氣成雲森不知其所
之何相思之可寄嘻去帝鄉之故舊謁本朝之君臣詠
七子之詩佩兩國之印恢我王度諭彼蕃臣三寸猶存
樂毅辭燕而未老十年在外信陵歸魏而逾尊子其行
乎余贈言者

送衡嶽瑗公南歸詩序

衡嶽瑗上人者常學道於五峰陰松棲雲與狼虎雜處
得無所得矣天寶癸巳歲始遊於長安手提瓶笠至自

萬里宴居吐論縉屬高之初給事中房公謫居宜春與上人風土相接因為道友伏臘往來房公既海內盛名上人亦以此增價秋九月杖錫南返扣門來別秦地草木撼然已黃蒼梧白雲不日而見滇陽有曹溪學者為我謝之

薦福寺光師房花藥詩序

心舍於有無眼界於色空皆幻也離亦幻也至人者不捨幻而過於色空有無之際故目可塵也而心未始同

心不世也而身未嘗物物方酌我於無垠之域亦已殆
矣上人順陰陽之動與勞侶而作在雙樹之道場以衆
花為佛事天上海外異卉奇藥齊諧未識伯益未知者
地始載於茲人始聞於我瓊蕤滋蔓侵迴階而欲上寶
庭盡蕪當露井而不合羣豔耀日衆香同風開敷次第
連九冬之月種類若干多四天所雨至用楊枝已開貝
葉高閣聞鐘升堂覲佛右繞七匝卻坐一面則流芳忽
起雜英亂飛焚香不俟於旃檀散花奚取於優鉢漆園

傲吏著書以稊稗為言蓮座大仙說法開藥草之品道無不在物何足忘故歌之詠之者吾愈見其嘿也

冬笋記

會心者行會行者祥故行藏於密而祥發於外欲人不知不可得也夫孝於人為和德其應為陽氣笋陽物也而以陰出斯其效歟重冰閉地密雪滔天而綠籜包生不日盈尺公之家執德庇人仗義藩國忘身於王室不家於朱戶公世載盛德人文冠冕又天姿大賢庭訓括

羽之日諸季式亦克用訓我爾身也共被為疎禮庇身
焉禦侮無所花萼韡韡爛其盈門兄弟怡怡穆然映女
且孝有上和下睦之難尊賢容衆之難厚人薄己之難
自家刑國之難加之以忠信文之以禮樂斯其大者
遠者況承順顏色乎況溫清枕席乎如是故天高聽卑
神鑒孔明不然苟曷為出哉視諸故府則昔之人亦以
孝致斯瑞也

讚佛文

竊以真如妙宰具十方而無成涅槃至功滿四生而不
庶故無邊大照不照得空有之深萬法偕行無行為滿
足之地惟茲化佛即具三身不捨凡夫本無五蘊實藉
津梁相法脫落塵容始於度門漸於空舍然後金剛道
後為三界太師玉毫光相得一生補處左散騎常侍攝
御史中丞崔公第十五娘子於多劫來植衆德本以般
若力生菩提家含哺則外輦羶勝衣而斥珠翠教從半
字便會聖言戲則翦花而為佛事常侍公頃以入朝天

闕上簡帝心雖功在於生人深辭拜命願賞延於愛女
密啟出家白法宿修紫書方降即令某月日敬對三世
諸佛十方賢聖稽首合掌奉詔落髮久清三業素成菩
薩之心新下雙鬟如見如來之頂綺襦方解樹神獻無
價之衣香飯當消天王持衆寶之鉢惟娘子舍諸珍寶
塗彼成香在微塵中見億佛刹如獻珠頃具六神通伏
願以度人設齋功德上奉皇帝聖壽無疆記椿樹以為
年土宇無垠包蓮花而為界又用莊嚴常侍公出為法

將入拜台臣身在百官之中心超十地之上夫人以文殊智本是法王在普賢心長為佛母郎君娘子等住誠性為孝順用闕德為道場將遍衆生之慈迴同一子之想又願普同法界盡及有情共此勝因俱登聖果

西方變畫讚

并序

法身無對非東西也淨土無所離空有也若依佛慧既洗滌於六塵未捨法求馱如幻於三有故大雄以不思議力開方便門我心猶疑未認寶藏商人既倦且息化

城究竟達於無生因地從於有相西方淨土變者左常
侍攝御史中丞崔公夫人李氏奉為亡考故某官中祥
之所作也夫人門為士族之先道為梵行之首大師繼
踵望塵而理印命婦盈朝聞風而素履心王自在萬有
皆如頂法真空一乘不立以示見故菩薩為勝鬘夫人
同解脫因天女讚維摩長者陟岵何至哀哀縗絰順
有漏法泣血以居念罔極恩滅性非報唯茲十力所護
豈與百身之贖不寶纓絡資於繪素圖極樂國象無上

樂法王安祥聖衆圍繞湛然不動疑過於往來寂爾無
聞若離於言說林分寶樹七重遶於香城衣捧天花六
時散於金地迦陵欲語曼陀未落衆善普會諸相具美
於是謁誠稽首隕涕焚香願立功德以備梯航得彼佛
身常以慈悲為女存乎法性還在菩提之家偈曰稽手
十方大導師能於一法見多法以種種相導羣生其心
本來無所動稽首無邊法性海功德無量不思議於已
不色等無礙不住有無亦不捨我今深達真實空知此

色相體清淨願以西方為導首往生極樂性自在

繡如意輪象讚并序

寂等於空非心量得如則不動離意識界實無所住常
遍羣生不捨有為懸超萬行法性如是豈可說邪如意
輪者觀世音菩薩陀羅尼三昧門現方便於幻眼六臂
色身以究竟為佛心體真相隨念即藏乃無緣之慈應
度而求斯不共之力衆生如意菩薩何心崇通等尼無
疑道登等貴族出家梵筵上首久積淨業三世皆空長

在道場一乘自立亡兄故河南少尹雖明世典深達實
相以不二法處於百官花萼相連恩深女弟旃檀舊統
望絕仁兄雖曰如夢無寧喪我煩惱性淨示有同凡之
悲菩提路空強為助道之相選妓惟絜底功加敬針鋒
線縷日就月將五彩相宣千光欲發金蓮捧足寶珠垂
髻原夫審像於淨心成形於纖手珊瑚掌內疑現不動
如來頻婆口中同乎無法可說焚香讚歎散花瞻仰有
情苦業滅而不生無上法輪轉而恒寂願以此福冥用

莊嚴乃為偈曰菩薩神力不思議能以一身遍一切常
轉法輪無所轉衆生隨念得解脫色即是定非空有是
故以色像觀音願以淨斯六趣福廻向過去不可得

給事中竇紹為亡弟故駙馬都尉於孝義寺浮圖
畫西方阿彌陀變讚并序

易曰游魂為變傳曰魂氣則無不之固知神明更生矣
輔之以道則變為妙身之於樂士大覺曰聖離妄曰性
克修其業以正其命得無法者即六塵為淨域繫有相

者憑十念以往生西方變者給事中竇昭敬為亡弟故
駙馬都尉某官之所畫也天理之愛加人數等悲讓佞
而無所痛殞身而莫贖傾無長之工不平分於我生將
厚貸於泉路尚茲繪事滌彼染業寶樹成列金砂自映
迦陵欲語曼陀未落墜此中年登乎上品池蓮寶座將
踰棠棣之榮水鳥法音當悟鵲鴿之力讚曰生因妄念
沒有遺識憑化而遷轉身不息將免六趣唯茲十力哀
此仁兄友于後生不知世界畢竟經營傍重熏獲悟自性

當成

為相國王公紫芝木瓜讚

并序

孝悌之至通於神明天為之降和地為之嘉植發書占
之推理可得何者人心本於元氣元氣被於造物心善
者氣應氣應者物美故呈祥於魚鳥或發揮於草木示
神明之陰騭與天地之嘉會今中書侍郎相公先生左
丞府君沈潛上德遐尚絕軌江海潏沔嬰孩杏壇高門
長軌隱几含素蓋鳳凰之高逝薄龍虎之逶迤積有淳

德誕敷餘慶而我相公生而英姿河目海口量與太素而無端倪應會神速動若發括事遣理盡澹然虛空亦猶太清雲無處所重玄之旨達而有餘奧大白之明漫而不及理文可以經邦訓俗武可以保大定功故天子咨之以布元化昔者高堂既聞扇枕無所歐血長號禮不能制其哭泣之度終身巨痛時無以加其霜露之惕攻苦食淡寢苦枕塊淚少於血骨餘於形風慘起而裂其心鳥悲鳴而感其哭俄而紫芝生棟葉成仙人之蓋色

奪齊侯之衣又有木瓜在林味若楚王之萍大如安期之棗枯木無生物之理而布獲滋蔓時果有常形之分而碩大殊凡鄰里駭之郡縣聞之公泣而不敢言州司遽表以獻或曰因心而致人之祥也或曰率土所生國之瑞也有識君子曰至孝所感物為人之祥大賢佐時人為國之瑞二物者雖感曩時之純至亦符今日之崇高也公尤不敢當歸美於今上以為震位先兆孝德動天至乾元二年乃畫圖以進詔報曰芝草者延壽之徵

也木瓜者投報之應也蓋至誠所感有開必先朕與卿
道契雲龍義同水石位崇台袞寄重股肱故得嘉瑞薦
臻靈物昭格君臣同德區宇克寧覽其進圖可為嘉應
請宣付史館者既依史策亦藏書府讚曰紫芝三秀則
生於梁木瓜一實其大盈筐嘉應薦至其故何祥哀哀
孝思漣漣泣血終身致毀每慟將絕雲為徘徊風為慘
切依仁據德移孝為忠經目盡理任心便公其道橐籥
虛而不窮公位先兆聖人斯覩賜以詔書藏之祕府邦

家之光榮終古

皇甫岳寫真讚

有道者古其神則清雙眸朗暢四氣和平長江月影太
華松聲周而不器獨也難名且未婚嫁猶寄簪纓燒丹
藥就辟穀將成雲溪

舊作
漢非

之下法本無生

裴右丞寫真讚

澹爾清德居然素風氣和容衆心靜如空智以窮理才
包至公大盜振駭羣臣困蒙忘身徇節歷險能通仁者

之勇義無失忠凝情取象惟雅則同粉繪不及清明在
躬麟閣之上其誰比崇

王右丞文集卷二

謹案卷一第十四頁前六行如人何足盡思按人
疑蟲字之訛

卷二第十六頁後六行重冰閉地刊本閉訛開今
改

卷三第一頁後一行月期政成按月期疑是期月
之訛

第一頁後八行父守真刊本真訛忠据唐書本傳
改

第二頁後六行是以小失天旨刊本旨訛作二日
二字今改


第二頁前六行伯達試經刊本達訛建按魏書司
馬朗字伯達十二試經為童字郎今据改又子
琰應詔刊本琰訛淡按後漢書黃琬字子琰年
七歲父以其言應詔深竒愛之今據改

第十五頁前七行惟良折獄刊本良訛長据書經
改

第二十四頁後六行為寶嚴之色按此句有脫字
第二十五頁前四行周密訛申未據孔氏六帖改
第二十八頁前二行以為教人以首按唐文粹無
人以二字

第二十八頁前六七行難入頤門妄思空花之狂
曾非慧日之咎刊本頤訛禁妄訛未慧訛思並
据唐文粹改





總校官庶吉士臣張能照

校對官庶吉士臣陳文樞

謄錄監生臣朱麟粹

欽定四庫全書薈要

集部

王右丞文集卷三
四



欽定四庫全書薈要卷一萬三千六百三十六

集部

王右丞文集卷三

唐王維撰

明顧起經注



裴僕射濟州遺愛碑

并序

夫為政以德必世而後仁齊人以刑苟免而無恥則刑
禁者難久百年安可勝殘德化者効遲三載如何考績

刑以佐德猛以濟寬月期政成成而不朽者惟公能之
公名耀卿字渙之河東聞喜人也益為帝虞實相帝舜
非子其胄而邑諸裴在漢者為水衡在魏者守代郡十
三代祖徽魏益豫雍究徐五州刺史蘭陵武公源於大
賢派以俊德世濟其美不殞其名矣曾祖正隋散騎常
侍長平郡贊理祖睿皇朝洛南南鄭二縣令著族斯茂
衣冠未敢爭雄繼世皆賢英彥無出其右故有常侍縣
君遞輝迭映父守真太常博士判駕部夏官員外今上

楚王府諮議叅軍邠寧二州刺史贈晉兗沂三州刺史
文儒之宗伯禮樂之本源籍業雖曰承家復始由乎種
德再典大郡二為仙郎舉十大夫是則是效且年不及
壽而位未稱德朝多其能歿而獨贈公則晉州之第三
子也語而能文有識便智為免則量過黃髮未仕而心
在蒼生伯達試經子琰應詔古之人也我不後之八歲
神童舉試毛詩尚書論語及第解褐補祕書省校書郎
歷中宗安國相王府典籤東觀載筆班固名香西園賦

詠劉楨氣逸轉國子主簿檢校詹事府丞學識宜在儒
林風度雅膺儲案河南府士曹叅軍考功員外郎公府
屈廊廟之才曹無留事仙郎明黜陟之法野無遺賢右
司兵部二郎中長安縣令其在含香一臺推妙以之製
錦四海是儀公之斷獄也必原情以定罪不阿意以侮
法是以小失天旨鮮合時宜出為此州刺史公推善於國不枉
無罪思利於人忘其屈已戮豪右以懲惡一至無刑旌孝
弟以勸善洪惟見德黜侈崇儉務材訓農通商惠工敬教

勸學授方任能行之一年郡乃大理襁負而至何憂乎

蕩析之人路不拾遺何畏乎穿窬之盜既富之矣汲黯
奚取於開倉使無訟乎仲由何施其折獄居無何詔封
東嶽關東列郡頗當馳道至於犧牲玉帛資糧屝屨其
或不供為有司所劾因而厚斂非天子之意豐省之度
多不得中故二千石有不能受事於宰旅者矣季孫請
魯視邾滕濤塗恐師出周鄭抑為是也公盡事君之心
且曰從人之欲萬斯箱之粟茲乃如京百執事之人於

我乎館四封之境二為帝庭一郡之賦再粒天下士卒
林會馬牛谷量皆投足獲安端拱取給無虞燥濕不畏
寇盜草莽之中用能使其體羈紲之外無所勞其力天
朝中貴持權用事厚為之禮則生我羽毛小不如意則
成是貝錦公享有常牢覲無私幣冒貨賄者我以為仇
淫芻蕘者吾所能禦至於急宣惠旨暴征庶物或命嘉
䟽先春當薦錫貢珍果非土所生舉是一隅其徒千計
皆曾不旋踵若取諸懷又不知其備預之所以然也謂

餽牢竭矣而家有餘糧謂疲勞甚矣而人有餘力豈非
積年之儲用之有度終身之逸使之有時不然班貢藝
事輕重以列我視子男之國而倍公侯之征今日之事
我為上也大駕還都分遣中丞蔣欽緒御史劉日政宋
珣等巡按皆嘉公之能奏課第一公未受賞朝而歸藩
天災流行河水決溢蝗蟲避境雖馬稜之化能然洪水
滔天固帝堯之時且爾高岸岑以雲斷平郊豁其地裂
噴薄雷吼冲融天迴百姓巢居主客有其家室五稼波

殄治毛荒於畎畝公急人之虞分帝之憂御衣假寐對
案輟食不候駕而星邁不入門而雨行議隄防也至則
平板榦具糗糧揆形略趾量功命日而赤岸成谷白濤
亘山雖有呂梁之人盡下淇園之竹無能為也乃有壞
防之餘衝波且盡僅在而危同累卵將墜而間不容髮
公暴露其上為人請命風伯屏氣以遷跡陽侯整波而
退舍又王尊至誠未足加也然後下密捷寧長茭土簣
雲積金鉞電散公親巡而撫之慰而勉之千夫畢飯始

就飲食一人未息不歸遽廬情者發憤以蹠勤懦者自
彊以齊壯成之不日金隄戕戕下截重泉上可方軌北
河廻其竹箭東郡鬱為桑田先是朝廷除公宣州刺史
公惜九仞之垂成恐衆心之或怠懷絲綸之詔密金玉
之音率負薪而益勤親執撲而彌勵既成乃發書示之
皆捨畚攀轅廢歌成泣淚而濟袂澤陰魯郊哀哀號呼
不崇朝而達四境噫公之視人也如子人之去公也如
父宜其升聞於天司我五教公之富人也以簡簡則不

擾而人得肆其業非富歟公之愛吏也以嚴嚴則畏威而吏不陷於罪非愛歟是其大旨也至若沛郡謂為神明淮陽謝其清淨尊經於學校魯風載儒加信於兒童齊人不詐明閑視聽其察姦也無全曉習文法於決事乎何有六義之製文在於斯五車之書學半於我其為身計保乎忠貞將為孫謀貽以清白熊軾之貴子弟夷於平人龍門則高賓客不遺下士非禮不動出言有章語曰愷悌君子人之父母其是之謂乎維也不才嘗備

官屬公之行事豈不然乎維實知之維能言之况夫婦
男女思我遺愛者吟詠成風耆艾人吏願頌清德者道
路如市則王襄所講奚斯之頌美政盛德綴詞之士固
未嘗闕如也維敢拒之哉頌曰童子何知兮公邁成人
大不必佳兮公德日新天生德於公兮遺此下民天子
命我兮守茲東郡人調公以謫去兮不能致訓公曾不
私已兮政聲益振惟歲十月兮帝封岱宗千乘萬騎兮
行幸山東小郡之賦兮再粒萬邦豐不盈儉不陋兮公

之舉也得中河為不道兮離常流以痛毒不用一牲兮
不沈一玉身當中流兮馮夷感而避賢敕陽侯兮使却
走夫洪漣板築既具兮薪又屬庶人欣以就役兮高岸
掘起於深谷人降丘宅土兮桑田鬱以載綠行無五馬
兮食不載味惠恤鰥寡兮威龍黠吏公之德兮曾無異
二人思遺愛兮淚淫淫歲久不衰兮至今性與天道吾
不得聞兮誌其小者近者兮已是過人之德音

京兆尹張公德政碑

并序○一作
見唐文粹

雲從龍風從虎氣應也聖人作賢人輔德同也君臣同
德天地通氣以康九有以遂萬類惟皇御極二十載光
格四表至於海隅日出越小大邦蠻貊師長罔不欽于
成憲以承天休然天子猶日省三揖

一作接

列辟曰

一作日

聽萬方輿頌懼人有未化賢有未登明敷仄陋兼乎十
等選宗室及乎九族任事以觀材積時以觀行乃得我
賢京兆焉夫京兆號為難理清淨病於不給刀筆拘於
守文或以軟弱廢或以賊殺劾把宿負淺為丈夫用鉤

距蓋非長者我則異於是大道難名大理無法閉關於

任數巧算不能知堅壁於畫一善政不能下推宿豪如

薙草無愠色視大權如厯塊無傲容百司之務總以奇

而得正

一作一德
以咸服

五方之人雜異教而同理受命之始

先聲已振黠吏惡少聞風改

一作族

行及乎鳴騶詣府登

堂坐定縣尹掾史以次上謁守正之人其氣高含章之

人其詞大見容色而聞號令小人戚

一作感

而君子泰日

者櫟陽男子閭里為豪借客報仇聚人為盜或白日手

刃或黃塵袖鎚政寬則以身先諸偷操急則以事中長
吏貳過不已萬計自脫公命吏縛之立死領下於是人
入閭室若遇大賓焉前年不登人賴太甚野無遺秉路
有委骨天子不忍征於不粒賦於無衣六軍從衛以臨
東諸侯息闕中也帝曰咨天之降威人罔畏罪台恐寇
盜迺邑矧曰蕩析離居惟爾克濟撫茲方夏一作西土公拜
稽首思塞休命布慈惠之政不以利淫振雷霆之威其
或宥過饗人減雙雞之膳圉人省五馬之秣陶不獻服

圻不墜館自身已往振廩同食雖人煙不動道瑾相望

不思濫以苟生咸守教以就死是不可能也先是王公

或專南山之利司農涸昆明之池收赤岸澤將為田以

便官至是悉奏罷之舟鮫衡麓之守廢蒲荷薪蒸之產

入自郊徂邑室有魚殮斬陰伐陽市多山木人得以贍

唯涇有防比歲多決近縣疲於力役他山匱於度材公

命刮朽壤填巨石辦大木去編管其始告勞乃終有慶

匠石日減功萬藏史日省錢億農始竟一作學未女始安

織於是台背黃髮之老

一作耆

曰我有田疇鍾秉其畝我

有子弟顏閔其行鄉黨以睦恂子失其獨道路有禮祀

汰無與爭酒先養老賄不問吏既無吠犬亦無奸人臨

年餘資幸

一作竊

蒙惠化其曷以臻茲君子曰此天子至

公內舉不避親錫汝明君

一作尹

張公之力也夫公於國

為外戚於帝為外弟重組累印珥香貂者七葉奉車駟

馬乘朱輪者十人勝衣則綺襦紈袴通籍則玉墀青瑣

動則兩駿如舞坐則五鼎成列文軒楚製素女趙舞而

公儼兮其若容淡兮其無味心在四教語稱七德目視

六籍口誦九歌懷君子令德之忠保詩人錫類之孝悌
有過於其被慈有踰於含食惡衣以居公服不敢降也
屈體下士王綱不敢替也協二姓之好以正人倫旁無
嬖御分一人之憂以審官政下多英傑若夫皇帝敬問
之詔御札自書天王命賜之衣上宮所製勞勤則中使
接武計議則走馬來朝豈唯衆臣重其經術為吏雜
以儒雅而已且公之一作德升聞於天非一朝一夕之漸也

亦所以稱職於累官著聲於所在其丞祕書也闕文遺
簡多在大家深為子孫之藏密有緘滕之固公不憚權
貴或抵或誘盡舊作畫非歸天閣官書備焉其牧郢下有也人字

人有不若德戮之不為暴人有不保居撫之不為諂存
者考其事壯其食以畜之行者緝其宮藝其樹以待之
此邦之人既優他邦之人又重一作至焉未盈一歲遂增

萬戶其守汾也仍歲大旱郡祠介推雖屢舞僊僊舊作仙非

而靈應未若公命束蘊取火伐樹寘薪釀酒而祝曰有

功於人祀為明神無德而祿禍亦覆餗自絳已來人實
祀子純犧大璧不敢愛必以薦也童兒季女不敢黷必
以敬也神既靡咎人將安仰若亭午而雨則樹其鷺羽
執此騂毛不然者火燎將至燉天鑠地靈衣且為煨燼
豐屋將為茂草爾其圖之言未畢而雲興拜未起而雨
降周於闔境不入他郡雖封疆咫尺而彼竭我盈嘻若
記能事載盛德渭川之竹不足簡終南之木不足軸夫
訓人至於禮義曰德安人免於阡危曰功德者上賞於

上下頌於下長老孜孜願刊於石以予學於舊史來即
我謀且維與人編戶與人為伍與人出入與人言語知
風俗之淳弊識政化之源本屬詞媿文書事益實詞曰
五代相韓七葉侍漢及我聖朝亦生邦翰大道無形貞
蠱以幹含章不耀在割能斷情偽萬端吾道一貫帝選
賢尹無以易張金印紫綬京兆之良一作章佩我鳴玉冠
我兩梁天子休命拜手以將寬而愛人立滅暴彊明明
天子哀此南畝將息西人遂覲東后我教我訓我鎮我

守茫茫三秦則罔餬口守死以義徇生不苟王曰外弟
視人不佻何以寵之手書以詔何以問之賜衣而朝俾
人華胥致君帝堯刻石作頌永世彌昭

魏郡太守河北採訪處置使上黨苗公德政碑

并序

五方殊俗魏風婉而其人舒九土異宜冀田壤

舊作懷非

而

其賦錯前政有寬猛之異時令有班藝之差非夫酌舊
典於可行啓新圖於必當多方而不失正一貫而或從
權曲成更人大抵厚俗選衆而舉非公而誰公先自吏

部侍郎出為安康郡太守某載月日詔以公為魏郡太
守河北道採訪處置使公諱某字郡縣人也其出處本
末奕世冠冕國史家牒詳焉凡邦伯到官詔使按部或
閉閣思政或下車作威或劾吏為明或移書示禁公異
於是可略而言公素號鮮明積有治行宿訟不決之務
餘地剖分疑獄自誣之枉容光立照故陋其思政也安
全長吏不逐老丞成就諸生光教小史導德齊禮有耻
且格故鄙其作威也謝亭長之問勞野次之賢吏悉謂

為神明人不隱其毫髮故無事効吏也列郡共職清節
銷其過求諸曹報簿直筆破其污詆故不待移書也山
東古之七雄河北有其四國地方數千里人蓋億萬計
獻子三歎之饋滋無舊德平原十日之飲顧有遺風朱
亥袖鎚豪雄扼腕曹王拂局輕薄為心奢泰擬都護之
堂遲緩學邯鄲之步公抑末技而敦本斥浮食以歸業
督課八政擇良吏以遣行講求六籍置學官於便坐於
是橫經左塾力穡先疇盡業農桑大興庠序家知禮義

更式段子之廬戶有京坻增修史起之貌鼓臺歌舞成
市鄴郡帝王舊都衽服靚粧挾筑怙屣淇上留客河間
數錢公課其組紵之庸開其婚嫁之節冶容絕四方之
袖織室致五匹之工刑於上官訓及處子鄭聲衛樂共
棄師襄趙帶燕裾思齊漆室漁陽騎客奏報本朝鯁海
樓船連漕絕域郊迎館給不敢闕其芻蕘水路陸衢盡
若安於枕席某載月日詔賜紫袍玉帶金魚袋衣若干
副方伯十聯賴其澄清之轡天子七命賜以安吉之衣

緹油屏車璽書增秩未是過也勝殘之化既成觀俗之
風允穆優游無事學官思歸况乎父母之邦近在嬰兒
之國表請拜掃有詔許焉預約守宰幸無偵候至郡則
投刺上謁至邑則舍車而徒展禮先塋摧心泣血廻趨
長老稽顙緒言宗人族姻姑黨姪行覲以重幣筐篚徧
於里閭享有加牢牛酒溢於衢陌朱軒駟馬耀於衡門
紫綬雙龜出入編戶蘇公佩印始歸鄉里盡歡疏傳散
金不與子孫為計迨乎將去仍以餘資一里置社備養

生送死之具一鄉置校開閱禮敦詩之本相如衣錦且
飛大漢檄書買臣懷紱不德長安廢吏故使巴蜀太守
負弩前驅會稽守丞引章下拜此蓋恨不禮於他日思

釋憾於故鄉是輕桑梓之人適騁斗筭之志豈若公自
心而至率禮無違來悅去思推才降體平陽傳舍不許
望塵山陰吏卒詎聞治道富貴還鄉榮之至也揚名顯
親孝之終也凡百君子無一至焉公當九伯之官兼八
使之任深總之體不求於無虞闕於草竊政成德舉

風動神行頃有勲臣旁典屬郡曩者風雲際會攀附騰
驤貪天之功以為己力謂國不忘尚嘉迺勲宋父宣驕
條侯倨貴當關常從橫恣不法帷帳狗馬僭侈踰制公
劾之則重傷國恩置之則大廢邦典於是喻以禍福告
之話言昔有不愛趙城將蹈滄海既尊漢室願遂赤松
功成不居道家所躋至於析珪分組跨壤連州懷四術
而自疑見九重而失望或冤家上變司敗受辭朝享膏
梁寧知獄吏暮成菹醢遍賜諸侯難恃白馬之盟徒思

黃犬之樂彫牆峻宇萬乘

闕

紫衣狐裘一朝而

數三罪雖嫌絳灌等列不逾梁楚為墟於是翕肩振驚

折節度教杜門謝絕賓客終身不紊紀綱以寬服人實

在有德厥有挾左道飛訛言南國青珠之符東海赤刀

之術分風送客割水飲人偽辯而納之於邪善誘而濟

之以惡戶外多保汝之屢恐為亂階

舊作塔非

門前無長者

之車知其惑衆公奉誅首惡悉宥面從丕蔽要囚惟良
折獄議事以制不徵於書副至仁之納隍用輕典於平

國刑期不濫人乃大安奏課計功天下小察責吏以實則舉其不矜欲人自新則貫其宿負官以德舉政以禮成至於賞善勸能正源端本齊風變魯益以悉禮名儒晉盜奔秦豈俟多誅惡少納貢獻賦則唯恐居後疇庸命賞則義不敢先布以聖恩奉宣明主之詔問其理狀對用議曹之言邦家之光其斯謂矣年若干秀才擢第應制舉第若干等授某官歷某官若夫明眸白晢玉潤珠耀美秀備於儀形風流發於言笑行之方也留如守

司智之圓也速若發括量包羣有思入無間壞壁古文
曲臺遺禮淮王九師之易漢氏三家之詩傳癖書淫鷹
揚學府比文園入室之武同丞相登科之策奏甚平讞
詩窮綺靡硯燔紙貴虎視詞林嘗奉和聖製雨中春望
詩云雨後山川光正發雲端花柳意無窮又奉和行幸
詩云接仗風雲動迎軍鳥獸舞時人以為鮑參軍謝吏
部為更生云某年月日詔除公河東太守兼採訪使官
吏百姓等或守闕乞留或遮道更借淚增時雨思結仁

風親愛之深諱名而號為父歌詠不足取姓以命其兒
公既去官多歷年所人思愈甚共立生祠異邑居而瓦
合無契約而磨至恐不預於聚財懼不任乎輸力棠樹
勿翦何如審像圖形祠鄉置祠豈比耳聞身及以此觀
德何德之深仍建豐碑立於祠宇匍匐千里前後百輩
永綴詞之客為頌德之文維也竊比老農不知舊史衆
心所至難抑與於輿人僕病未能不獲已於求我乃為
頌曰禹別九州漢分八使寔惟方伯且曰連帥建節乘

輶觀風察吏山東河北全趙大魏授方任能惟名與器
蓋非其才孰享斯位天子命我導揚皇風敬教勸學通
商惠工法去太甚政貴得中守丞老病小吏童蒙督郵
不遂博士成功遂安賢者大啓儒宮四國之餘一都之
會平原舊俗信陵遺態博塞以遊椎埋為害叢臺淇水
燕裾趙帶淳化旁屬貞風俶載劈繡卷綃橫經秉耒舊作
非乘耒清節峻邈碩量弘深投書置水酹酒捐金樹德滋
蔓持刑不淫訛言免坐倨貴懷音繡衣罷斧墨綬停琴

既此時雨當聞作霖申哀松栢展敬桑梓伏謁公門徒
行故里推心馬鬣啓顙鯁齒身紆紫綬禮及童穉帝賜
黃金盡於筐篚社養宗人學招邑子能事具舉令問允
穆璽書改印緹油轉轂壁挂胡牀舍留官牘人吏老幼
涕泗號哭頌德豐碑圖形華屋閱實數美移晷更僕

故右豹韜衛長史賜丹州刺史任君神道碑

并序

君諱某字某其先奚仲之後於周為上卿世有功列於
諸侯氏則任鬱為著族後有官於京兆者子孫因家焉

今為萬年縣人也遠祖某漢河東太守曾祖某周清河
太守克復舊職異世而同符祖某隋梁州南鄭縣令父
某皇石州離石縣令不墜象賢一門而二鳧鳬皆為政
以德遺愛在人能高其門必有興者雖不當代果生達
人君離石府君之第某子也膺一賢之期鍾累葉之善
忠孝自得稟乎天姿詩禮輔成潤以庭訓文含四始雕
蟲之技附庸武有七德啼猿之術居外明經者皓首弱
歲成儒達法者腐脣端居曉吏以鄉貢明經擢第解褐

益州新都尉居無何丁母憂廬以長號淚少於血杖而後起骨餘於形彈琴不成從先王之禮捧筐便慟有終身之哀服闋授左金吾衛兵曹叅軍轉左衛錄事叅軍又遷右豹韜衛長史王樂為用率武夫以扞城人愛其才稱君子之為衛方將冠章甫之冠衣縫掖之衣奏議雲臺論政赤墀一見天子必為之前席三說大臣必為之解印若端委以相六合盡宅心於帝庭授鉞以董八蠻可傳首於魏闕然後挂冠東郡拂衣五湖高蹈煙虹

笑謝珪組天命不祐沮我良策春秋若干以某年月日

寢疾卒於永興里第某年月日葬於京兆神禾

舊作和原

禮也嗣子曰某善繼先志克成厥家多藝多才安英實

選匪

閨

實寶十城之價不以力聞萬夫之敵命同御座

漢帝以恩待故人超將中軍先軫以才登元帥以某年

月日從駕謁五陵天子若曰自古明王

舊作三

因心以孝

待人由已以施物故休戚共憂樂同也其贈羽林將軍
任某父使持節丹州諸軍事丹州刺史敬其事則命以

始寵其身以及其親明主所以盡心忠臣所以盡力故

羊舌職悅是賞也陳力異代官成聖朝修文下泉名在

天爵前賢陰德雖貽慶於後昆脩子揚名乃大顯於先

父養則致樂沒而有稱昔也為士享唯將軍之食今則

典邦莖亦諸侯之禮皇帝命之太史書之報昊天之恩

曾舉世未有豈與夫手樹行櫟躬廬長松負土成墳傭

身以葬匹夫之孝同年而語哉君少有大略長而能賢

安於仁樂於苦厚生以儉守智以愚視事

舊作是

非所及筆

硯盈庭其力文也容膝之外圖書滿屋其嗜學也八體

之能右軍曾未知翰五弦之妙中散何擅於琴以禮庇
身以清守官惟邦之彥惟國之翰夫人河東裴氏始以
其為光祿也封河東郡君及是又贈河東郡太君子之
忠由母之教母以子貴不亦宜乎司文者執簡以往刊
石旌德其詞曰薛侯之裔兮代濟其美不墮其名是生
碩德兮為世作程忠不祐孝不福兮早謝休名身為士
兮子為卿大將羽林兮統天兵天子寵兮為崇榮贈我

武符兮賜我專城青松寂寂兮晝無人聲狗不吠兮雞
不鳴蒼茫千古兮孰云旌賴孝子兮揚音英

大唐故臨汝郡太守贈秘書監京兆韋公神道碑

銘
并序

坑七族而不顧赴五鼎而如歸徇千載之名輕一朝之
命烈士之勇也隱身流涕獄急不見南冠而繫遜詞以
免北風忽起刎頸送君智士之勇也種族其家則廢先
君之嗣戮辱及室則累天子之姻非苟免以全其生思

得當有以報漢棄身為餌俛首入橐偽就以亂其謀佯

愚以折其僭謝安伺桓溫之亟蔡邕

舊作邕非

制董卓之邪

然後吞藥自裁嘔血而死仁者之勇夫子為之公諱某

字某京兆杜陵人也昔豕韋氏主盟於商後扶陽侯重

世相漢高祖某官父某某官並勲德茂著史牒詳焉公

即文貞公之仲子也初以宰相子弁髦署吏抱拜授封

加朝散大夫封平樂郡公累拜某官丁文貞公憂又丁

某國夫人憂無容顧禮殆不勝喪終身之痛歷稔猶毀

幼無童心長積純氣抱其天素立於人紀先聖微言宿
儒未辨貫穿精義總括旁說文言蔚於興表筆態托於
力外子虛上林敢云雄似黃庭團扇方議鴈行鶴氅之
姿羊車奪映會選公壻詔婚王室天家焜燿獨任素風
時論騰踴宜在右職乃拜中書舍人動翔鳳之詠啓迪
古詩下流水之書敦崇雅誥轉太常少卿六宗九奏悉
具其儀天神地祇可得而禮俄入覲累貶巴陵太守稍
遷壽春太守又遷臨汝太守其理務教訓其政尚寬簡

謂其叙在六官又踐三事疇咨帝載必歌九功之德式
和人則必復三代之英天子避其用親奸臣惡其異已
馮衍竟廢揚雄不遷抑古人而有之何夫子之命也逆
賊安祿山吠堯之犬驅彼六驥憑武之狐猶威百獸藉
天子之寵稱天子之官徵天子之兵逆天子之命始反
幽薊稍逼溫洛云誅君側尚惑人心列郡無備百司安
堵變折衝為賊矣兼法令而盜之將逃者已落彀中謝
病者先之死地密布羅網遙施陷穽舉足便跌奮飛即

挂智不能自謀勇無所致力賊使其騎劫之以兵署之以職以孥為質遣吏挾行公潰其腹心候其間隙義覆元惡以雪大恥嗚呼上京既駭法駕大遷天地不仁穀洛方鬪鑿齒入國磨牙食人君子為投檻之援小臣若喪家之狗偽疾將遁以猜見囚勺飲不入者一旬穢溺不離者十月白刃臨者四至赤棒守者五人刀環築口戟枝入頸縛送賊庭實賴天幸上帝不降罪疾送賊恫瘝在身無瑕戮人自憂為厲公哀予微節私予以誠推

食飯我致館休我畢今日歡泣數行下示予佩玦斫手
長吁座客更衣附耳而語指其心曰積憤攻中流痛成
疾恨不見戮專車之骨梟枕鼓之頭焚骸四衢然臍三
日見子而死知予此心之明日而卒某年月日絕於洛
陽某之私第以某月日返葬於某原禮也皇帝中興悲
憐其意下詔褒美贈秘書監天下之人謂之賞不失德
矣公敦穆孝友明允篤誠高居化源濡跡物軌元昆曰
陟伯與仲居愛之欲無方視之若不足薄其私而厚其

室抑謙已而讓其名故有靈芝聳蓋嘉木連理時人以
為孝悌之祥而公昆季謙而不以聞也維穉弱之契晚
年彌篤吾實知之能言者乃為銘曰

銘亡

大唐大安國寺故大德淨覺師碑銘

并序

光宅真空心王之四履建功無旱法將之萬勝故大塊
羣籟無弦出法化之聲恒沙衆形為寶嚴之色至和六
師兆亂四諦祖征開甘露狹小之門出臭煙朽故之宅
踞寶牀而搖白拂徐誘草菴沃金瓶而繫素繒遂登蓮

座足使天口雄辯刮語燒書河目大儒培仁擊義斯為
究竟孰不歸依禪師法名淨覺俗姓韋氏孝和皇帝庶
人之弟也中宗之時後宮用事女謁寢盛主柄潛移戚
里之親同分珪組屬籍之外亦綰銀黃況乎天倫將議
封拜促尚方令鑄印命尚書使備策詰朝而五土開國
信宿而駟馬朝天禪師歎曰昔我太師尚以菩提釋位
今我小子欲以恩澤為侯仁遠乎哉行之即是裂裳裹
足以宵遁乞食餬口以兼行入太行山削髮受具尋某

禪師故蘭若居焉猛虎舐足毒蛇熏體山神獻果天女
散花澹爾宴安曾無喜懼先有涸泉枯柏至是布葉跳
波東魏神泉應焚香而忽湧北天衆果候飛錫而還生
禪枝必復之徵法水再興之象聞東京有願大師乃脫
履戶前摳衣座下天資義性半字敵於多聞宿植聖胎
一瞬超於累劫九次第定乘風雲而不留三解脫門揭
日月而常照雪山童子不顧芭蕉之身雲地比丘欲成
甘蔗之種大師委運遂廣化緣海澄而龍額珠明雷震

而象牙花發外家公主長跪獻衣薦紳先生却行擁篲

乞言於無說請益於又損天池杯水遍含秋月之輝草

葉樹根皆霑宿雨之潤不窺世典門人與宣父中分不

受人爵廩食與封君相比至於律儀細行周密護持經

典深宗毫釐剖析窮其二翼即入佛乘趣得一毛亦成

僧寶於是同凡現疾處順將終忽謂衆人有疑皆問我

於是夜當入無餘開口萬言音和水鳥踴身七樹光映

天人如甕出行泯然跌坐以某載月日歸大寂滅某月

日遷神於少陵原赤谷蘭若香油細氎用以茶毗合璧

連珠為之葬具城門至於谷口幡蓋相連法侶之與都

人縞素相半叩膺拔髮灑水坐塵升堂入室之徒數踰

七十破山澍海之哭聲振三千則有僧某乙尼某乙故

惠莊某氏某郡主賢者某乙等各在衆中共為上首或

行如白雪或名詎紅蓮或為勝鬘夫人或稱毗邪居士

舊作
七非

二空法外何處進求七覺分中誰當決釋猶依舍

利冀獲菩提身塔不出虎溪淚

舊作
非

碑有同羊峴表心

成相相非離於真如敘德以言言豈著於文字乃為銘

曰小三千界後五百年空乘玉牒莫覩余仙無量義處

如來之禪皆同日論誰契心傳其弟在人間各歸鳳闕

去日留訓別時剪髮累賜金錢將加印紱忽爾宵遁終

然兩絕其救頭學道裹足尋師一花寶樹八水香池戒

生忍草定長禪枝不疑少父更似嬰兒其既立勝蟠併

摧邪網利眼金翅圓身寶掌巧撮死龍能調老象魔種

敗壞聖胎長養其四生滅度五陰虛空無說無意非異

非同此身何處彼岸成功當觀水月莫怨松風

其五

能禪師碑

并序○唐文粹上有六祖字下有銘字凡一作見文粹

無有可捨是達有源無空可住是知空本離寂非動乘
化用常在百法而無得周萬物而不殆鼓枻海師不知
菩提之行散花天女能變聲聞之身則知法本不生因
心起見見無可取法則常如世之至人有證於此得無
漏不盡漏度有為非無為者其惟我曹溪禪師

一本下有乎禪

師三字俗姓盧氏某郡某縣人也名是虛假不生族姓之

家法無中邊不居華夏之地善習表於兜戲利根發於

童心不私其身臭味於耕桑之侶苟行

一作適

其道能

一作

羶

行於蠻貊之鄉年若干事黃梅忍大師願竭其力即

安於井曰素剗其心獲悟於稊稗每大師登座學衆盈

庭中有三乘之根共聽一音之法禪師默然受教曾不

起予退省其私迴超無我其有猶

舊本
獸非

懷渴鹿之想尚

求飛鳥之跡香飯未消弊衣仍覆皆曰升堂入室測海

窺

舊作
扇非

天謂得黃帝之珠堪受法王之印大師心知獨

得謙而不鳴天

舊作回非

何言哉聖與仁豈敢子曰賜也吾

與汝弗如臨終遂密授以祖師袈裟

舊作娑非

而謂之曰物

忌獨賢人惡出已吾

一作予

且死矣汝其行乎禪師遂懷

寶迷邦銷聲異域衆生為淨土雜居止於編人世事是

度門混農商於勞侶如此積十六載南海有印宗法師

講涅槃經禪師聽於座下因問大義質以真乘既不能

酬翻從請益乃歎曰化身菩薩在此色身肉眼凡夫

舊作

大願開惠眼遂領其

一作徒

屬盡詣禪居奉為挂衣親自

削髮於是大興法雨普灑客塵乃教人以忍曰忍者無
生方得無我始成於初發心以為教人以首至於定無
所入慧無所依大身過於十方本覺超於三世根塵不
滅非色滅空行願無成即凡成聖舉足下足長在道場
是心是情同歸性海商人告倦自息化城窮子無疑直
開寶藏其有不植德本難入頓門妄繫空花之狂曾非
慧日之咎常歎曰七寶布施等恒河沙億劫修行盡大
地墨不如無為之運無礙之慈弘濟四大生庇三有既

而道德遍覆名聲普聞泉館卉服之人去聖歷劫塗

舊作

途非身穿耳之國航海窮年皆願拭目於龍象之姿忘身

於鯨鯢之口駢立於戶外趺坐於牀前林是旃檀更無
雜樹花惟薝蔔不嗅餘香皆以實歸多離妄執九重延
想萬里馳誠思布髮以奉迎願叉手而作禮則天太后
孝和皇帝並敕書勸諭徵赴京城禪師子牟之心敢忘
鳳闕遠公之足不過虎溪固以此辭竟不奉詔遂送百
衲袈裟及錢帛等供養天王厚禮獻玉衣於幼人女后

宿因施金錢於化佛尚德貴物異代同符至某載月日
中忽謂門人曰吾將行矣俄而異香滿室白虹屬地飯
食訖而數坐沐浴畢而更衣禪指不留水流燈焰金身
永謝薪盡火滅山崩川竭鳥哭猿啼諸人唱言人無眼
目列郡慟哭世且空虛某月日遷神於曹溪安座於某
所擇吉祥之地不待青鳥變功德之林皆成白鶴嗚呼
大師至性淳一天姿貞素百福成相衆妙會心經行宴
息皆在正受談笑語言曾無戲論故能五天重跡百越

稽首修蛇雄虺毒螫之氣銷跳爰彎弓猜悍之風變畋

漁悉罷蠱醢知非多絕羶腥効桑門之食悉棄罟網襲

稻田之衣永惟浮圖之法實助皇王之化弟子曰神會

遇師於晚景聞道於長

一作中

年廣量出於凡心利智踰

於宿學雖末後供樂最上乘先師所明有類獻珠之願

世人未識猶多抱玉之悲謂余知道以頌見託偈曰五

蘊本空六塵非有衆生倒計不知正受蓮花承足楊枝

生肘苟離身心孰為休咎

其

至人達觀與佛齊功無心

捨有何處依空不着三界徒勞八風以茲利智遂與宗

通其二愍彼偏方不聞正法俯同惡類將興善業教忍斷

嗔修慈捨獵世界一花祖宗六葉其三大開寶藏明示衣

珠本源常在妄轍遂殊過動不動離俱不俱吾道如是

道豈在吾其四道遍四生常依六趣有漏聖智無義章句

六十二種一百八喻悉無所得應如是住其五

大薦福寺大德道光禪師塔銘并序

禪師諱道光本姓李繇州巴西人其先有特有流若實

有蜀蓋子孫為民大父懷節隱峨嵋山行無轍跡其季父榮為道士有文知名禪師幼孤在諸免其神獨不偶家頗苦乏絕玄詣鄉校見周孔書曰世教耳誓苦行求佛道入山林割肉施鳥獸鍊指燒臂入般舟道場百晝夜經行遇五臺寶鑑禪師曰吾周行天下未有如爾可教遂密授頓教得解脫知見舍空不域即動無朕不觀攝見順有離覺毛端族舉佛刹掌上斷置世界不覩非咎應度方知得其門者寡故道俗之煩而息化城指

盡謂窮性海而已焉足知恒沙德用法界真有哉春秋
五十二夏以大唐開元二十七年五月二十三日入般
涅槃於薦福僧坊門人明空等建塔於長安城南畢原
人天會葬涕泗如雨禪師之不可得法如此其世行遺
教如一切賢聖維十年座下俯伏受教欲以毫末度量
虛空無有是處誌其舍利所在而已銘曰嗚呼人天尊
全身舍利在畢原

故任城縣尉裴府君墓誌銘

天寶二年正月十二日唐故魯郡任城縣尉河東裴府君卒於西京新昌坊私第享年三十九嗚呼哀哉君諱回字玉溫河東聞喜人也曾祖宏泰皇雍州錄事參軍贈上黨長史祖思義皇侍御史吏部員外左司郎中戶部吏部侍郎河東郡太守晉城縣開國子父敷珍皇薛王府騎曹參軍自晉已降世為冠族令德不替以至於君夫其事親孝兄弟順與朋友信其從政公平而壽不中年官才一命慈母在堂諸弟未仕兜未有識女且嬰

孩妻夭於前身歿於後天可問邪其若老親何其若季
仲諸孤何生人之悲莫甚於是家貧祭以棗脯殮以時
服以某月日祔葬於鳳棲原先府君之塋嗚呼有河東
裴子之墓誌之蓋古有之繼後之知者亦何有哉銘曰
一死萬紀終天不復為之奈何哀哀慟哭覆載至廣庶
類繁育萬物方春而就於木

工部楊尚書夫人贈太原郡夫人京兆王氏墓誌

銘

并序

夫人諱某京兆霸城人也晉出三家公子尊於魏國秦
亡六國時人謂之王家河南則分虎臨人華陰則老熊
當道高祖德真皇左僕射祖九思京兆府三原縣令父
潛河南府告城縣令大名之後重光不替夫人令儀淑
德發於天姿閑禮明詩傳乎世業言成女誠可著於緇
紉行為女師詎資於行待豈止彈琴吐論誦賦吟詩而
已及乎有行嬪於君子事姑至孝旁穆六姻為母深慈
均養七子男以無雙令德降帝子於鳳樓女則第一解

空歸法王之象教閨門之訓朝野稱多既而家列公侯

地連妃主珠翠滿座不御采衣方丈盈前准甘素食同

德大師大照和尚覩如來之奧昭羣有之源夫人一入

空門便蒙法印朱簾紺幃無復餘乘龍藏寶經悉通至

義惠用圓滿誠力堅嚴藥藉茹葷雖愈疾而不受心已

久淨縱沒

舊作
設非

齒而常安以某年月日奄歸大寂於長

興里之私第厥初寢疾彌曠旬時駙馬上人柴毀骨立

揮淚嘗藥身不解衣泣血持經手不釋卷晝夜懺悔非

止六時身命供養寧唯七寶御醫繼踵中使重跡魂兮

不反空焚外國之香生也有涯非無上天之樂某月日

有詔追贈太原郡夫人襄城石帘增寵其榮名翟裼魚

軒空悲於象設以某月日安厝於某原禮也功德之至

散花天女不留釋梵之筵勝鬘夫人何在嗚呼哀哉乃

為銘曰天生淑德實俾宜家特能柔順深棄驕奢詎離

環珮不御鉛華其婦道允諧母儀俱美每出誠夫停冷

訓子賦掩西征書教內史其門容高幃庭列長筵男乘

翠鳳女比紅蓮繁華貴里寂寞安禪

其朝

含香兮禮聞

夕青瑣兮黃扉方天公兮密啓建出牧兮高麾俄入守

兮京兆賜黃金兮被皁衣

其捐

余珮兮江中隱思君兮

不可窮歌泰山兮不返夢濟洹兮遂空素車兮逶遲宛

鄉關兮故時望國門兮不入到泰山兮不知瞻舊域兮

松楸平原夕兮素漣愁魂兮歸來江南不可以久留

唐故潞州刺史王府君夫人榮國夫人墓誌銘

并序

夫人姓盧氏范陽人也昔堯命伯夷典秩宗號太常為

尚父桓襄之際公子食盧卯金故人王於大國越石從事官至中郎曾祖士會隋行臺侍御史祖某皇朝奉禮郎父某豪淄邛等三州刺史持斧衣繡威加不法奠玉瘞帛舉無違禮守臨淄而齊免不詐去臨邛而蜀物盡留夫人即府君之長女積累世之德鍾二門之美儀表秀整進止詳閑不咨保傳動由詩禮既以七族冠時遂歸齊大之偶入持門戶內事舅姑枕席溫清於堂上環珮逶迤於堂下不脫簪珥親當澣濯玄纁可實於筐篚

案盛可獻於宗廟魚軒或駕翟茀而朝衆婦於是修容
夫人專之以禮克贊君子累至大官雅政清德實多左
右潞州早世深秉義方母儀可則庭訓不替女史之學
多讚大家之書衆婦之儀盡稟夫人之法天與盛德不
降永年以某月日寢疾薨於長安善和里享年若干以
某月日合祔某山原禮也子某某官淳孝之性泣血待
盡永惟令德固不可泯彰示後人乃刊於石銘曰有姜
之後或邑於盧歷代種德示有稱孤從事文府振轡長

途其一憲府持法奉常秉禮皇考專城腰章郡邸厚德重

跡深仁繼體其二降生哲人其行惟惇儀形衆庶門冠諸

姻齊姜宋子敢望清塵其三君子之貳實聞高義乃躬澣

濯先晨簪珥穆及外親敬是中饋其四母儀既峻庭訓載

揚子以才貴煌煌寵章馳暉難駐令問空長其五壽宮既

啓高堂永寂千秋萬古山川松栢紀德誌行唯茲貞石

其六

汧陽郡太守王公夫人安喜縣君成氏墓誌銘序

夫人字某某郡人也其先周成王之後古之錫姓命氏或以先父之職官或因始祖之名謚漢魏以降史牒詳

焉曾祖休寧某官祖某某官襲封常山公貳公執帛調護儲闈九伯剖符典司方岳漢雄左輔實拜翁歸周命僕臣惟茲伯罔夫人即太僕府君之第二女也世有明訓家無遺德蕙心紈質豈曰師成螭首蛾眉抑惟天與同雲降雪常聞柳絮之詩獻歲發春即賦椒花之頌言事姑舅宜其家室寢門纔闢笄六珈而問安擊鐘未晞

具八簋而獻饋染朱與綠不愆公子之衣采藻及蘋有
甚季姜之祭魚軒翟裼為諸侯之夫人鳴佩垂環對有
國之君子綺疏寓目助選賢人青帳藩身用酬高論善
持門戶能睦族姻誠良人之從政不啻原獸訓愛子之
為政遂返池魚言成大家之書行為衆婦之法至於彈
琴製賦纂組攻書具舉百事之能仍居四德之外嗚呼
降年不永春秋五十以某載月日薨於長安平康里之
私第某月日祔於咸陽洪瀆原之先塋禮也不獲偕老

空傷奉倩之神未始有生誰達莊周之理長子濡前某
官次子澄某官次曰某某官及女等連連泣血乳乳在
疚哀纏聖善痛七子之無依文敘塞淵冀九原之可識
銘曰齊侯之子兮衛侯之妻膚如凝脂兮手如柔荑奉
初之嘉訓兮淑德日躋供養兮姑舅簪珥問安兮先夜
漏製三縑兮玄纁具五獻兮籩豆翟裼兮錦衣駕魚軒
兮來歸從如雲兮滿中闈忽形沉兮影絕夫傷神兮子
泣血悲餘澤兮猶在怨迴文兮未滅返葬兮咸陽寒天

暮兮渭水長嗟梧桐兮半死無雙飛兮鳳凰

王右丞文集卷三

欽定四庫全書薈要卷一萬三千六百三十七

集部

王右丞文集卷四

唐王維撰

明顧起經注

哀辭祭文

宋進馬哀辭

并序○凡一作見劉校本

宋進馬者中書舍人宋公之子也公無弟兄子一而已

交則有擇

一作文則有種

德亦惟肖忽疾倏逝醫不及視宋公

哀之他人悲之故為詞曰

背春涉夏兮衆木藹以繁陰連金華與玉堂兮宮閣鬱
其沉沉百官並入兮何語笑之啞啞君獨靜默以傷心
草王言兮不得辭裁悲減思兮少時僕夫命駕兮出閭
闔歷通達陌上人兮如故識不識兮往來眼中不見兮
吾兒驂紫騮兮從青驪低光垂彩兮恍不知其所之闕
朱戶兮望華軒意斯子兮候門忽思瘞兮城南心替亂
兮重昏仰訴天之不仁兮家唯一身身止一子何肩嗣

之不繁就單斟而又死將清白兮遺誰問詩禮兮已矣

哀

舊作
彎非

從中兮不可勝豈暇料天

一作
餘

年兮復幾日黯

黯兮隕

一作
類

曄鳥翩翩兮疾飛邈窮天兮不返疑有日

兮來歸靜言思兮永絕復號咷

一作
驚

兮沾衣客有弔之

者曰觀未始兮有物同委蛻兮何悲且延陵兮未至况
西河兮不知學無生兮庶可幸能聽於吾師

祭兵部房郎中文

為人作

維載月日朔某官某乙謹以酒脯之奠敬祭於故兵部

郎中房公之靈嗚呼君子之才周而不器苟求行道未嘗私身沈靜好謀話言必雅往歲穀貴闕輔阻飢眷命自天發廩以賑中朝乏使屬之鄙夫不敢自賢請子爲介匹夫嫠婦黃口之孤鍾釜之施罔不必當舉無棄粒野有頌聲國家厭兵革苦徵戍大召浮食以靖國人單車諭旨萬里窮磧西度赤坂館於烏孫形勞者病神勞則天棄成功於末路未復命而言謝死不廢命忠也尸而加紳寵也我盟而撫子瞑受舍求仁得仁其誰不死

玉關之下素車倭遲愁雲晝聚白雪春下絳旄從風車
徒行哭至上京而不駐將返葬於關東河活活而東注
天慘慘而悲風道路猶長子實途窮人世如舊子實成
空我有旨酒以歆以餞想像明德獻歆出涕尚饗

為楊郎中祭李員外文

維載月日朔行尚書司勳郎中賜緋魚袋楊玄璋等謹
以清酌少牢之奠敬祭於故左司員外郎李公之靈嗚
呼大朴難名大辯若訥泊兮無兆汎然隨物直而好學

敏以從事行隱於寡言文成於沈醉澡身浴德唯仁與
義讀書甚解作賦彌工麗詞秀務奧義玄通記言西掖
起草南宮第五將姪伏波事嫂食先與甘衣必讓好口
嘗其糲身席於藁結友一言同官一日徇我朋好忘其
身恤豈惟攜手亦將加膝明明天子惟賢是思恨馮唐
之已老喜相如之同時罷刊書於虎觀將載筆於鳳池
嗚呼病時七啓臥內一訣痛乾坤而忽窮嗟古今而長
絕永言北首返葬東周何夫子之適去同衆人之若休

歷千門而行哭動九陌而增愁馬悲鳴而笳咽雲寡色
而風秋玄璋等或結髮舊遊比肩同列悲薤歌之首路
哀柳車之就轍嗟無見而空來痛不知而成列嗚呼哀
哉尚饗

為兵部祭庫部王郎中文

惟公弘量碩德抱義戴仁早離我見常守吾真朝稱端
士世謂淳人夏官之職惟賢是寄既節五官兼選騎士
宿衛扞城必由茲地速應為敏平分是貴決遣先馳曹

無留事嗚呼積善無慶寢疾彌留唐肆求馬夜壑藏舟
深悟幻境獨與道遊死而不忘魂兮若休嗚呼某等何
幸得備官屬泰然若春溫兮如玉去德何永事生何促
五情如喪百身不贖敬薦醴牢哀哀慟哭尚饗

為人祭李舍人文

年月日某以茶藥之奠祭於故舍人李公之靈嗚呼見
人多矣未有如子生於德門長於貴里名高江夏之童
貌奪河陽之美行比曾顏才兼文史含恣輕肥偃仰純

綺惡如涕唾棄如塵滓比布衣以同年甘蔬食而沒齒
嗚呼深入度門高居道源獨一靜處寂默無言待草誠
之真性歸化光之法尊曠無淨染頓離塵根豈期昨日
分首別離未久萬法皆空一生何有無餘涅槃應無所
受無漏智慧斯為不朽予以凡情哀哀其後世相謂然
道心斯醜敢不從俗子其無咎

為人祭某官文

惟公弘量碩德寡言敏行直而能婉和而不競儒墨為

鋒鏑在顏冉之季孟白雲刑官繡衣使者時無冤人路
多避馬既踐文昌來司武庫冀翟車之高足為鳳池之
先路豈期位薄德崇才遠途窮拜命之時初一朝於北
闕移疾於外不再入於南宮嗚呼哀輓悲笳寒天疎木
宅不卜地祔於故塋家無餘財斂以時服弟難會葬免
未及哭其營護而莫遣惟甥姪與姻族某嘗同官實喜
良友仰德彌高立言不朽居常接膝未忍分手況永訣
兮無期向空筵而灑酒尚饗

為羽林將軍祭武大將軍文

維年月日將軍某等謹以清酌少牢之奠祭於故大將軍武公之靈嗚呼武公命代出羣氣益朔方勇冠六軍生長下國聲聞上天天子壯之命居北門北門伊何國之重寄羽林孤兒旄頭突騎罔不畢勸為之元帥帝在紫微與君為衛身恒披堅手不捨銳出乘天駟入並東第同官為寮出入五世顧我軍旅凜然遺風一日之長萬夫之雄身雖有極德不可窮嗚呼門館蒼黃風景淒

涼櫪馬悲鳴角弓不張弔客接武哭聲滿堂嗚呼凡人
有喪匍匐斯救况我武公屢及其雷盟而撫之哈玉當
受敢不嗣事如公之舊

為崔常侍祭牙門姜將軍文

維大唐開元二十五年歲次丁丑十一月辛未朔四日
甲戌左散騎常侍河西節度副大使攝御史中丞崔某
致祭於故姜公之靈嗚呼天子命之建旗西門帶甲十
萬鐵騎雲屯橫挑強胡飲馬河源嗟爾勇健表為牙門

牙門伊何全齊大族四方有事誓死鳴轂前有血刃後
有飛鏃其氣益振大呼馳逐翩翩白馬象弧雕服戈春
其喉矢集其目嗚呼天下無事今上好文爾有餘勇莫
敢邀勲腰鞬白首蹉跎塞雲死於裨將誰統前軍家本
秦人靈車東驚長天積雪邊城欲暮麾下行哭前旌抗
路身有寶劍不佩而去轅有代馬悲鳴踟顧嗚呼我誠
軍吏令送爾歸既素我服亦朱其衣黥虜未滅壯士長
辭牢醴以祭太息歔歔尚饗

為王常侍祭沙陁鄯國夫人文


維年月日朔河西節度使左散騎常侍王某遣總管石
抱玉以酒牢之奠致祭於故沙陁鄯國夫人之靈嗚呼
惟此淑德降於異域至性不師天姿靡飾禮容詎假於
環珮工藝非因於組織行閨訓於穹廬成母儀於蕃國
懿此清範夫人之則沙陁令門外家之力嗚呼夫人歸
命干戈遂寢子孫扞城國家高枕居之右地革其左衽
散辮垂鬟解裘衣錦嗚呼降年不永遠日方臨寂矣高

堂飲珠含玉哀哉貴女刃面摧心嗚呼聖朝命我護此諸
蕃夫人所出天子加恩能守漢制不効夷言馬無北首
車必南轅教義所及忠信彌敦寶嘉內訓用潔斯樽尚
饗

王右丞文集卷四

余閱唐宋志及經籍考藝文略與夫遂初堂祕閣二書
目悉稱公集十卷其文居十之四已梓於洞庭徐少宰
所余既為公勒成詩箋而復以其文編校而并刻之斯
為全書矣惜吳刻舊多錯漏今用叅之文粹英華洎劉
會孟本迺糾其失款者八字補其脫缺者十七字更其
差者三十四字總五十九字俾讀者有驗於嵩簡而無
迷於帝虎也不亦為藝圃一快邪歲丙辰日北至夫湫
山人顧起經跋

謹案卷四第二頁後五行大名浮食按名字疑訛



總校官庶吉士臣張能照
校對官檢討臣王鍾健
騰錄監生臣孫起鵬